

ဟေမြဲ

ဟေမြဲ ခရစ်ယာန်လေဟို့ ပေးစာ

နိဒါန်း

ဟေမြဲ ခရစ်ယာန်လေဟို့ ပေးစာ ဟာ ခွန်အားပေးဟွားဟူ ပေးစာတစောန်ဖြစ်ဘီး အယ်ပေးစာဟာ ဓမ္မဟောင်းကျမ်း ရဲ့ ပရောဖက်ပြုချစ်လေ ဘောင်ဂီးဟာ ယေရှုအားဖြင့် ပုလဲဇောင်ဟွားဘီး ဆိုဇာဟို့ ဖော်ပြဟွားဟယ်။ ဟေမြဲ ခရစ်ယာန်လေရဲ့ စာစောန်ထဲမာ ဓမ္မဟောင်းကျမ်းဟို့ ညွှန်း ဟွားဟူ ကျမ်းပိုဒ်ပေါင်း ၆၀ ကျော်ရှိဘီး အယ်ကျမ်းပိုဒ် လေဟာ ပရောဖက်ပြုချစ်န ယုဒလူမျိုး ယဇ်ပုရောဟိတ် မန်းရဲ့ တာဝန်လေဟာ ယေရှုအားဖြင့် ပုလဲဇောင်ဟွားဘီး ဆိုဇာဟို့ ရှင်းရှင်းလန်းလန်း ဖော်ပြဟွားလေဟယ်။ အယ် မူ ကြောန်းရာလေကြောန့် အယ်စာစောန်ဟာ ယုဒလူမျိုး ခရစ်ယာန်လေဟို့ ခွန်အားပေးဟွားဇာ ဖြစ်ဟယ် ဆိုဇာဟာ ခိပါယ် ထန်ရှားနေလေဟယ်။ ဟေမြဲစာစောန်ဟာ ပညတ် တရားဟာ ယေရှုအားဖြင့် ပုလဲဇောင်ဟွားဘီး။ အယ်ကြော န့် ယဇ်ပုရောဟိတ်လေဟာ နော-က်တခါ ယဇ်ပူဇော်ဇာ လိုဟွမ်း ဆိုဘီး ဖော်ပြဟယ်။ ယေရှုဟာ ပြစ်ဂူလောင်း တွပ် တခါဒဲန ကာလပတ်လောင်းတွပ် ပူဇော်ပေးဟူ ယဇ် ကောန်ဖြစ်ဟယ်။ ဘုရားသခင်ဟို့ အားကိုးနိုင်အောန်

ကျွန်တော့်ဟူးလေတွင် လောက်ဆောန်ပေးဟူ ယေရှု ခရစ်တော် နှော့-က်ဟို့လိုက်ဟို့န ကိုယ်တော့်ဟို့ အားကိုး ဟို့တွင် ကျွန်တော့်ဟူးလေ ခေတ်မာရှိဟူ ခရစ်ယာန်လေ ဟို့ ခွန်အားပေးဟူးဇာလေဟို့လည်း ဟေဗြဲခရစ်ယာန် လေဟို့ ပေးစာထဲမာ တို့နိုင်ဟယ် (၁၂.၂)။

ဟေဗြဲပေးစာဟို့ ဖယ်လူရေးဟယ် ဆိုဇာဟို့ ဖယ်လူ လည်း သိဂေဟူ။ အယ်ဘေမဲ့ ကျမ်းစာပညာရှင်လေဟု တမန်တော် ပေါလု၊ လုကာ အယ်မျိုးမှုဘဲနေဟူ ဗာနဗ ဆိုဘီး ကြံပြုဂေဟယ်။ ရေးသားဟူးဟူ နေ့ရစ်ဟို့လည်း သိဂေဟူ။ အယ်ဘေမဲ့ အယ်ပေးစာဟို့ ခရစ်တော် မွီးဖွား ဘီးန ၇၀ ခုနှစ်တိုင်ခန်ဟု ရေးဟူးဟယ် ဆိုဘီး များစုဟု ယောင်ကြည်ဂေဟယ်။ အေဒီ ၇၀ ခုနှစ်မာ ယေရုရှလင် မြို့ဟု ဖျစ်ဆီးခံရဟယ်။ အယ်ဘေမဲ့ အယ်ပေးစာဟို့ ရေးဟူစာရေးသူဟု ယေရုရှလင်မြို့ဟု ဖျစ်ဆီးခံရသေး ဟုမျိုး ပြောဟူးလေဟယ်။ ဟေဗြဲပေးစာဟု ရောမမြို့ မာ ရေးဟူးဘီး (၁၃.၂၄) သင်းတော်လေ ဘောင်ဂီးကြား ထဲမာ ပုလုံန့်ဟူးဟယ်။

ကြောင်းရာ ကျဉ်းချောက်

၁။ စာရေးသူဟု ယေရှုဟု ဘုရားသခင်ရဲ့ ပရောဖက် လေန ကောန်းဂန်တမန်လေထဲမာ မြင့်ဆောင်းဖြစ်ဟု ယ် ဆိုဘီး ဖော်ပြဟူးဟူကြောင်း (၁.၁-၄.၁၃)

၂။ အယ်ဘီးန သူဟု ယေရှုဟု ယေရုရှလင်မြို့မာရှိ ဟူ ဘုရားသခင်ရဲ့ ဗိမာန်တော်ထဲဟု မှုဆောန်ဖြစ်ဟူ

ယဇ်ပုရောဟိတ်လေထဲမာ မြင့်ဆောင်းဖြစ်ဟယ် ဆို
ဘီး ထပ်ဆစ်ဖော်ပြဟူးဟူကြောင်း (၄.၁၄—၇.၂၈)

၃။ ယေရှုရဲ့ မူတော်မြတ်ဟာလည်း မောရှေဟို့ ပေး
ဟူးဟူ ပညတ်တရားအားဖြင့် ကိုယ်တော်ရဲ့ လူမျိုး
တော်နတူးဒု ဘုရားသခင်လောက်ဟူးဟူ ဘောတူညီ
မူဟောင်းထဲမာ မြင့်ဆောင်းဖြစ်ဟူကြောင်း (၈.၁—
၁၀.၃၁)

၄။ ယေရှုဟာ ဂူလောင်းထဲမာ မြင့်ဆောင်းဖြစ်ဟယ်
ဆိုဘီး ရှင်းပြဘီးန စာရေးသူဟု လတ်တုံကုလဟူ
ညွှန်ကြားချစ်လေ ဘောင်ဂီးဟို့ ပေးဟူးဟူကြောင်း
(၁၀.၃၂—၁၃.၁၇)

၅။ နှော့-က်ဆောင်းမာ စာရေးသူဟာ ခွန်အားပေးဇာ
လေချို့န နှော့-က်ဆစ်ဘီးဟာ အယ်ပေးစာဟို့ နိဂေါ
င်းချောက်ဟူးဟူကြောင်း (၁၃.၁၈—၂၅)

သားတော်ဟုနေတဆစ် ပေးတော်မူဟူ ဗျာဒိတ်တော်
ကြောင်း

¹ ရှေးကာလမာ ဘုရားသခင်ဟာ ပရောဖက်လေ
အားဖြင့် နို့ဘိုးဘေးလေဟို့ နည်းဘောင်းဇောင်န ခါဘီး
ခါ ဗျာဒိတ်ပေးတော်မူဟယ်။

² အယ်ဘေမဲ့ အယ်မူ နှော့-က်ဆောင်းဖြစ်ဟူ ကာလမာ
သားတော်အားဖြင့် နို့လေဟို့ ဗျာဒိတ်ပေးတော်မူဟယ်။
ဘုရားသခင်ဟာ အယ်မူသားတော်ဟို့ ရှိမျှဂူလောင်းရဲ့ မှီ

ခံဖြစ်န ခန့်ဟူးဘီးဟာ လောကဓာတ်လေဟို သားတော်
အားဖြင့် ဖန်ဆင်းတော်မူဟယ်။

³ အယ်သားတော်ဟာ ဘုရားသခင်ရဲ့ ဖောင်းရောန်ခြည်
တော်န ဇာတိဖြစ်တော်ရဲ့ ပေါင်သဏ္ဌာန်ဖြစ်ဟူကြောန့် တ
ဂိုးတော်န ပုလဲဇောင်ဟူ သူရဲ့ စကားတော်အားဖြင့် ရှိမျှ
ဂူလောင်းဟို တည်စေတော်မူဘီး ပြစ်လေတွပ် စင်ကြယ်
ရှင်းဝတ်ဟို ပြုဘီးဟာ မြင့်ဟူရပ် ထတ်ကောင်းဂန်မာ
အနန္တတဂိုးရှင် ဘုရားသခင်ရဲ့ ညာဖတ်မာ ထိုင်နေတော်မူ
လေဟယ်။

သားတော်ဟာ ကီးမြတ်တော်မူဟူကြောန့်

⁴ သားတော်ဟာ ကောင်းဂန်တမန်လေထတ် ကီးမြတ်ဟူ
ဘွဲ့နာမတော်ဟိုခံရဟူမျိုး ကောင်းဂန်တမန်လေထတ် ကီး
မြတ်ဟူသူလည်း ဖြစ်တော်မူဟယ်။

⁵ ဖြားဖြစ်ကြောန့်နူးဆိုဟာ ဘုရားသခင်ဟု ဖယ်ကော
န့်ဂန်တမန်လေဟိုမှ၊

“နန်ဟာ ငါ့သား ဖြစ်ဟယ်။

အယ်နေဘဲ နန်ဟို ငါဖွားမြင်စေဘီ” ဆိုဟူဇာန၊

“ငါဟာ သူ့ဖ ဖြစ်မယ်။

သူလည်း ငါ့သား ဖြစ်လေ့မယ်” ဆိုဘီး

ဖယ်ခါဒူးဟု မိန့်တော်မူဖူးနူး။

⁶ နှော-က်ဘီး ဘုရားသခင်ဟာ သူရဲ့ သားဦးဟို အယ်
လောကဟို စေလွှတ်တော်မူဟူ ခီမာ၊

“ဘုရားသခင်ရဲ့ ကောန်းဂန်တမန်လေ ဂူလောင်းဟာ
ပျပ်ဝပ်ကိုးကွယ်ရမယ်” ဆိုဘီး မိန့်တော်မူလေဟ
ယ်။

⁷ နှော့-က်ဘီး ကောန်းဂန်တမန်လေန ပတ်သတ်ဘီး
ဖော်ပြရာမာ၊

“ဘုရားသခင်ဟာ သူ့ရဲ့ ကောန်းဂန်တမန်လေဟို ဝိညာဉ်
မျိုးရော၊

သူ့ရဲ့ စေခံလေဟို မီးလျှံမျိုးရော ဖြစ်စေတော်မူဟ
ယ်” ဆိုဘီး မိန့်တော်မူဟယ်။

⁸ အယ်ဘေမဲ့ သားတော်ဟို မိန့်တော်မူဟူ ခီမာ ကိုယ်တော်
ဟု၊

“အို၊ ဘုရားသခင်၊ ကိုယ်တော်ရဲ့ ရာဇပလ္လင်ဟာ ကမ္ဘာ
ဆစ်ဆစ် တည်လေ့မယ်။”^{*}

ကိုယ်တော်ရဲ့[†] နိုင်ငံဟာ တရားသဖြင့်စီရင်ဟူ နိုင်ငံ
ဖြစ်ပါဟယ်။

⁹ ကိုယ်တော်ဟာ ပြောန့်မတ်ဟူ တရားဟို ရှစ်မြတ်နိုးဘီး
တရားဘဲဟူ ဇာလေဟို မူးတော်မူဟယ်။

အယ်ကြောန့် အို၊ ဘုရားသခင်၊ ကိုယ်တော်ရဲ့ ဘုရားသခ
င်ဟာ

^{*} **1:8 ၁.၈** အို၊ ဘုရားသခင်၊ ကိုယ်တော်ရဲ့ ရာဇပလ္လင်ဟာ ကမ္ဘာဆစ်ဆစ်
တည်လေ့မယ်၊ အယ်မျိုးမှုဘဲနေဟာ ဘုရားသခင်ဟာ ကိုယ်တော်ရဲ့
နိုင်ငံဖြစ်ဟယ်။ [†] **1:8 ၁.၈** ကိုယ်တော်ရဲ့၊ တချို့ မူရင်းလတ်ရေးမူလေမာ
သူ့ရဲ့၊ ဆိုဘီး ပါရှိဟယ်။

ကိုယ်တော်ရဲ့ ပေါင်းဖော်လေထတ် ကိုယ်တော့်ဟို ချီး
 မြေ-ကံဘီး
 ရွှင်လန်းဝန်းသာဟူ ဆီန ဘိသိက်ပေးတော်မူဘိ” ဆို
 ဘီး မိန့်တော်မူလေဟယ်။

10 နှော-ကံဘီး၊

“အို၊ ဘုရားသခင်၊ ကိုယ်တော်ဟာ ဦးဆောင်း မှလေဂီးဟို
 တည်တော်မူပါဟယ်။
 ကောင်းဂန်ဟိုလည်း လတ်တော်န ဖန်ဆင်းတော်မူဟူ
 ဇာ ဖြစ်ပါဟယ်။

11 အယ်မူဇာလေဟာ ပျစ်စီးသွားရဟူလည်းဘဲ ကိုယ်
 တော်ဟာ မြဲဒမ်း တည်တော်မူဟယ်။
 အယ်မူဇာလေ ရှိဟူမျှဟာ ဝတ်လေမျိုး ဟောင်းနွမ်း
 ဟားလေ့မယ်။

12 ကိုယ်တော်ဟာ အယ်ဇာလေဟို ဝတ်လောင်လိဟူမျိုး
 လိတော်မူလေ့မယ်။
 အယ်ဇာလေဟာ ဝတ်လောင်ဟူမျိုး ပုလောန်းလဲဟား
 လေ့မယ်။

အယ်ဘေမဲ့ ကိုယ်တော်ဟာ ပုလောန်းလဲတော်မူဟူ။
 သတ်တော်လည်း ကူဆောင်းဟ” ဆိုဘီး မိန့်တော်မူ
 လေဟယ်။

13 နှော-ကံဘီး ဘုရားသခင်ဟု၊

“နန့်ရဲ ရန်သူလေဟို နန့်ရဲ ခေဖွားအော့-က်ဟို ငါ့လထား
ခန်ခီထိ၊

ငါ့ရဲ ညာဖတ်မာ ထိုင်နေပါ” ဆိုဘီး

ဖယ်ကောန်းဂန်တမန်လေဟို မိန့်ဖူးဟူကြောန်းနူး။

¹⁴ ကောန်းဂန်တမန်လေဟာ ကယ်တန်ရှင်းမို့ဟို ခံရ
ဟို သူလေဟို ပြုစုစောင့်ရှောက်-က်ဟိုတွပ် ဘုရားသခင်
စေလွှတ်တော်မူဟူ စေခံဝိညာဉ်လေ ဖြစ်ဂေဟယ် မူဟု
လော။

2

ထူးမြတ်ဟူ ကယ်တန်ရှင်းကြောန်း

¹ အယ်ကြောန်း နို့လေဟာ လွဲချော်သွားဘဲနေအောန်
ကြားရဟူ ဒေသနာတော်လေဟို စိန်လောင်းထဲမာ မှတ်မိ
စွဲလန်းမှုရှိဂေရမယ်။

² ကောန်းဂန်တမန်လေအားဖြင့် ထားတော်မူဟူ ဗျာဒိတ်
တော်ဟာ မှန်ကန်ဘီး ပြစ်မှားကျူးလွန်ဟူမူ မျိုးမျိုးလေ
ဟာ ခံထိုက်ဟူပြစ်ဒန်လေဟို ခံရဟိုမှန်မယ် ဆိုဟာ၊

³ စဉ်းဟုနေဘီး သခင်ဘုရားဟောတော်မူဟူ တရား
စကားတော်ဟို ကြားရဟူသူလေဟု ယောင်လော့-က်
ဟူသတ်သေအားဖြင့် နို့လေဟို ဟောပြောဟူ အယ်မျှ
လော့-က်ကီးမားဟူ ကယ်တန်ရှင်းတရားဟို နို့လေနား
ထောန်ဘဲနေဟာ ပြစ်ဒန်န ဖယ်မျိုးလွတ်ဂေလေ့မယ်နူး။

⁴ အယ်မူသတ်သေခံဟူ သူလေနတူးဒူ ဘုရားသခင်
ဟာ နိမိတ်လတ်ခဏာနဖြစ်ဖြစ်၊ အံ့ဩဘွယ်ဟူ မူလေ

နဖြစ်ဖြစ်၊ ထူးဆန်းဟူတဂိုး ဘောင်းဇောင်နဘဲဖြစ်ဖြစ်၊
သန်ရှင်းဟူဝိညာဉ်တော်ဟာ သူ့ရဲ့ လိုတော်ရှိဟူတိုင်း ဝီ
မျှပေးဟူ ဆုကျေးဇူးလေနဖြစ်ဖြစ် သတ်သေခံတော်မူဟု
ယ်။

ကယ်တန်ရှင်းဟို့ ပို့ဆောန်ဟူသူကြောန်း

⁵ နို့လေပြောဆိုဟူ နှော-က်ကပ်ကမ္ဘာဟို့ အောက်စိုး
ရဟူခွမ်ဟို့ ကောန်းဂန်တမန်လေရဲ့ လတ်မာ အပ်ပေးဟွား
ဇာ မူဟူ။

⁶ ကျမ်းစာတချစ်မာ၊

“လူဟာ ဖယ်မျိုးသူ ဖြစ် ဟူ ကြောန် ကိုယ်တော် ဟာ
အော့-က်မေ့လေးထားရပါနူး။ လူသားဟာ ဖယ်
မျိုးသူဖြစ်ဟူကြောန် ကေ့ရှရပါနူး။

⁷ ကိုယ်တော်ဟာ သူ့ဟို့ ကောန်းဂန်တမန်လေထတ် နဲနဲ
ဟွား နိကုလစေတော်မူဘီးဟာ
သူ့ရဲ့ ခေါင်းဟို့ ဖောင်းသရေတော်န ပတ်ရစ်တော်မူ
ဘီး၊*

⁸ ရှိမျှဂူလောင်းဟို့ ကိုယ်တော်ရဲ့ ခေဖွားအော့-က်မာ
ခလဟွားတော်မူဟယ်” ဆိုဘီး ဖော်ပြဟွားလေဟု
ယ်။

“ဂူလောင်းဟို့ ခလဟွားတော်မူဟယ်” ဆိုဘီး သတ်သေ
ခံဟွားဇာဟာ ခလဟွားဘဲန ကျန်ရစ်ဟူ ဇာလေ ဖြားဇာ

* 2:7 J-2 မူရင်းလတ်ရေးမူလေ ဘောင်ဂီးမာ ကိုယ်တော်
ဖန်ဆင်းဟွားဟူရာလေ ဂူလောင်းထတ်မာ သူးနို့ဟို့
အောက်ချောက်သူလေဖြစ်န ဖန်ဆင်းဟွားဟယ်၊ ဆိုဘီး ပေါင်းထဲဟွားဟယ်
(ရှု ဆာ ၈.၆)။

လည်း မေ့ဟု။ ခုဆိုဟာ ဂူလောင်းဟို့ ခုလဟားဇာလေဟို့
နို့လေမြင်ရသေးဟု။

⁹ အယ်ဘေမဲ့ ယေရှုဟာ ဘုရားသခင်ရဲ့ ကျေးဇူးတော်
အားဖြင့် လူလေ ဂူလောင်းတွပ် သေခံရဟူခွင့် ရှိစေဟို့
ကောင်းဂန်တမန်လေထတ် နဲနဲဟား နိကုလခံရဘီးမှ သေ
ခံရဟူကြောန့် ခေါင်းတော်မာ ဖောင်းသရေတော်န ပတ်ရစ်
ဘီး ရှိနေဇာဟို့ နို့လေမြင်ရဂေဟယ်။

¹⁰ ဖြားဖြစ်ကြောန့်နူးဆိုဟာ သားမီးလေ ဘောင်ဂီးဟို့
ကယ်တန်ဘီး ဖောင်းစည်းဇိမ် စံစားရာဟို့ ပို့ဆောန်ဟူ သ
ခင်ဟာ ဒေါက်ခဝေဒနာလေအားဖြင့် စောင်လင်ရှင်းဟို့
ရော-က်ရဟို့တွပ် ရှိမျှဂူလောင်းဟို့ ဖန်ဆင်းဘီး အောက်
စိုးတော်မူဟူ ဘုရားသခင်ဟာ စီရင်တော်မူလေဟယ်။

¹¹ သန်ရှင်းပေးဟူသူန သန်ရှင်းခံရဟူ သူဟာ ဖတ
ယော့-က်ဒဲဘဲ့ ရှိဟယ်။ အယ်ကြောန့် သန်ရှင်းပေးဟူ ယေ
ရှုဟာ သန်ရှင်းခံရဟူ သူလေဟို့ ညီကို မောန်နှမလေ ဆို
ဘီး ခေါ်ဟူဇာဟို့ ယှစ်ကြော့-က်တော်မူဟု။

¹² ယေရှုဟု၊

“ကျွန်တော်ဟာ ကိုယ်တော်ရဲ့ နာမတော်ဟို့ ကျွန်တော့်ရဲ့
ညီကို မောန်နှမလေဟို့ ကြားပြောပါမယ်။
ပရိသတ်စည်းဝေးလယ်မာ ကိုယ်တော့်ဟို့ ချီးမွမ်းဘီး
ချင်းဆိုပါမယ်” ဆိုဘီး မိန့်တော်မူလေဟယ်။

¹³ နော့-က်တချစ်ဟု “ငါဟာ ဘုရားသခင်ဟို့ အားကိုး
မယ်” ဆိုဘီး လာဟယ်။ နော့-က်ဘီး “ငါဟုနေစဘီး ငါ့

ဟို ဘုရားသခင်ပေးဟူးဟူ သားမီးလေရှိဟယ်” ဆိုဘီး လာလေဟယ်။

14 အယ်သားမီးလေဟာ သွီးသားဇာတိန ဆစ်ဆံဟူ သူ လေဖြစ်ဟူကြောန့် ကိုယ်တော်ဟာ သွီးသားဟို ခံယူဘီး သေခံတော်မူဟူ ဇာအားဖြင့် သေရှင်းတရားဟို စိုးရဟူသူ ဖြစ်ဟူ မာရ်နတ်ရဲ့ တဂိုးဟို ခုလိုးဖဲဖျစ်ဆီးဟို့တွပ်န၊

15 တသတ်လောင်း သေဘေးဟို့ ကြော-က်ဘီး ကျန်ခံ နေရဟူ သူလေဟို့ လွတ်ရှင်းပေးဟို့တွပ် ဖြစ်ဟယ်။

16 တကယ်ဘဲ ကိုယ်တော်ဟာ ကောန်းဂန်တမန်လေဟို့ မဇဟူဇာမူဘဲ အာဗြဟံမျိုးနွယ်ဟို့ မဇတော်မူဟူဇာ ဖြစ် ဟယ်။

17 အယ်ကြောန့် ကိုယ်တော်ဟာ လူလေရဲ့ ပြစ်လေ ဟို့ ဖြေလွတ်ဟို့တွပ် သစ်စာ၊ ကရုဏာနပုလဲဝဟူ ယဇ်ပုရောဟိတ်မန်း ဖြစ်န ဘုရားသခင်ရဲ့ မူတော်ဟို့ လောက်ဆောန်နိုင်ဟို့တွပ် ရာရာမာ သူရဲ့ ညီကိုလေန တူ ရဟို့ကြောန်း ရှိလေဟယ်။

18 အယ်ကြောန့် ကိုယ်တော်ဟာ အယ်မျိုး စောင်ဇမ်း နှော-က်ယှစ်ရှင်းလေဟို့ ကိုယ်တိုင်ခံဘီး ဆင်းရဲဒေါက် ခလေန ကျင်လည်ဖူးဟူကြောန့် စောင်ဇမ်းနှော-က်ယှစ် ရှင်းမူရာလေန တွဲကြောင်ရဟူသူလေဟို့ ကူညီမဇဟို့တွပ် တတ်နိုင်တော်မူလေဟယ်။

မောရှေထတ် သခင်ယေရှု ကီးမြတ်ဟူကြောင်း

¹ အယ်ကြောန့် ကောန်းဂန်ဘောင်န စပ်ဆိုင်ဟူ ခေါ်ယူ ရှင်းကျေးဇူးဟို့ ခံရဟူသူ သန့်ရှင်းဟူ ညီကို မောန်နှမ လေ၊ နို့လေဝန်ခံဟူ တမန်တော်န ယဇ်ပုရောဟိတ်မန်းဖြစ် ဟူ ယေရှုရဲ့ကြောင်းဟို့ စေ့စေ့ဆင်ခြင်ဂေ့ပါ။

² မောရှေဟာ ဘုရားသခင်ရဲ့ အီတော်တအီလောင်းဟို့ သစ်စာစောန့်ဟူမျိုး ယေရှုဟာ သူဟို့ ခန့်အပ်ဟူးဟူသူရဲ့ မူတော်ဟို့ သစ်စာစောန့်တော်မူဟယ်။

³ အီဟို့ဆော့-က်ဟူသူဟာ အီထတ် ပိုဘီး ဂေါင်သရေရို ဟူမျိုး ယေရှုဟာ မောရှေထတ် ပိုဘီး မြင့်မြတ်ဟူ ဖောင်း သရေတော်ဟို့ ခံထိုက်ဟူသူ ဖြစ်ဟယ်။

⁴ ဖြားဖြစ်ကြောန့်နူးဆိုဟာ အီဟို့ ယော့-က်ယော့-က် ဟု ဆော့-က်ရဟူဇာဖြစ်ဟယ်။ ရှိမျှဂူလောင်းဟို့ တည် ဆော့-က်ဟူသူဟာ ဘုရားသခင်ဘွဲ့ဖြစ်ဟယ်။

⁵ မောရှေဟာ နာဂတ်ကာလတွပ် ဟောပြောမယ့် ရာလေ ဟို့ သတ်သေခံဟို့တွပ် စေခံကျွန်တယာ့-က်ဟူမျိုး အီ တော်တအီလောင်းဟို့ သစ်စာစောန့်လေဟယ်။

⁶ ခရစ်တော်ဟာ ဘုရားသခင်ရဲ့ အီတော်ဟို့ စိုးရဟူ သားတော်နေန အောက်စိုးဘီး သစ်စာစောန့်တော်မူဟယ်။ နို့လေဟာ ရဲရင့်ရှင်း၊ မျှော်လင့်ရှင်းလေန ဝါကြွားဝန်းသာ ဘီး ဆောင်းထိ ယောင်ကြည်စီခလရှင်းရှိမယ် ဆိုဟာ နို့ လေဟာ ကိုယ်တော်ရဲ့ အီတော်ဖြစ်လေဟယ်။

ဘုရားသခင်ရဲ့လူစုတော်တွပ် ငြိပ်ရှင်းကြောင်း

7 အယ်ကြောန့် သန့်ရှင်းဟူဝိညာဉ်တော် မိန့်တော်မူဟူ
ဇာဟူ၊

“အယ်နေမာ နန်းနို့လေဟာ ဘုရားသခင်ရဲ့ ဗျာဒိတ်တော်
သံဟို့ ကြားရဂေဟူကြောန့်

8 စိန့်လောင်း ခိုင်မာဂေန။

နန်းနို့ဘိုးဘေးလေဟာ ကိုယ်တော့်ဟို့ ပေါင်ကန်ဘီး
တောကန္တာရမာ မျိုးမျိုး စောင်ဇမ်းဂေဟယ်။ သူး
နို့လေ ခေါင်းမာဟူမျိုး နန်းနို့ခေါင်းမာဂေန။

9 နန်းနို့ဘိုးဘေးလေဟာ နှစ်လေးဆယ်လောင်းလောင်း
ငါပြုဟူ မူရာလေဟို့ မြင်ရဟူလည်းဘဲ ငါ့ဟို့
ဆန့်ကျင်ဘီး စောင်ဇမ်းဂေဟယ်။

10 အယ်မျိုးဖြစ်ဟို့ အယ်မျိုးဆစ်ဟို့ ငါမျစ်ထွပ်ဘီး ‘သူး
နို့လေဟာ မြဲဒမ်းဘဲ စိသဘော မှားယွင်းတတ်ဂေ
ဟယ်။
ငါ့ရဲ့ အလေ့လာ ငါ့ရဲ့ တရားလမ်းဟို့ သိဂေဟ့’ ဆို
ဘီး ငါဆိုရဟယ်။

11 အယ်ကြောန့် သူးနို့လေဟာ ‘ငါ့ရဲ့ ငြိပ်ရှင်းထဲဟို့ ဝမ်ရ
ဂေဟို့ မူဟ့’ ဆိုဘီး
မျစ်ထွပ်ဟူကြောန့် ငါကီဆိုဟယ်” ဆိုဘီး မိန့်တော်မူ
ဟူတိုင်း၊

12 ညီကို မောန့်နှမလေ၊ သတ်ရှင်တော်မူဟူ ဘုရားသခ
င်ဟို့ ကျောခိုင်းဟူဇာအားဖြင့် မယောင်ကြည်ဘဲ ဆိုးညစ်
ဟူစိန့်လောင်း မှော့ဘဲနေဟို့တွပ် ဒိထားဂေပါ။

13 ပြစ်ဒုစရိုက် လှည့်ဇားဟူဇာအားဖြင့် နန်းနို့စိနှလောင်း ခိုင်မာဘဲနေဟို့တွပ် အယ်နေ့ ဆိုဘီး ခေါ်ဟူခိ ရှိဟူမျှ ကာလပတ်လောင်း ရှင်းရှင်း တယော့-က်ဟို့တယော့-က် အားပေးဘီး တိုက်တွန်းနှိုးဆော်ဂေပါ။

14 ဖြားဖြစ်ကြောန်နူးဆိုဟာ နို့လေဟာ စိစွဲလန်းရှင်းန စပြုဟူမျိုး ဆောင်းထိ စိခလယောင်ကြည်မယ် ဆိုဟာ ခရစ်တော်န စပ်ဆိုင်ဟူသူလေ ဖြစ်ဟယ်။

15 ကျမ်းစာတော်ဟု

“အယ်နေ့မာ နန်းနို့လေဟာ ဘုရားသခင်ရဲ့ ဗျာဒိတ်တော် သံဟို့ ကြားရဂေဟူကြောန် ဆန့်ကျင်ဖတ်ပြုဟူ ကာလမာရှိဟူမျိုး စိနှလောင်းခိုင်မာဂေန်” ဆိုဘီး ဖော်ပြလေဟယ်။

16 အယ်မျိုး ကြားဘီးမှ ဆန့်ကျင် ပေါင်ကန်ဟူသူလေ ဟု ဖယ်သူလေနှူး။ မောရှေနေ့-က်ဟို့လိုက်ဘီး အဲဂုတု တုပြည်ဟု ထွပ်လာဟူသူ ဂူလောင်းဟာ အယ်မျိုးပြုဂေ ဟယ် မူဟုလော။

17 နှစ်လေးဆယ်လောင်းလောင်း ဘုရားသခင်ရဲ့ မျစ် တော်ဟို့ ခံရဟူသူဟာ ဖယ်သူလေနှူး။ ဒုစရိုက်ပြစ်ဟို့ ပြု ဟူကြောန် တောကန္တာရထဲမာ လဲဘီး သေဂေဟူသူလေဘဲ မူဟုလော။

18 “နန်းနို့လေဟာ ငါ့ရဲ့ ငြိပ်ရှင်းထဲဟို့ ဝမ်ရဂေဟု” ဆို ဘီး ကိဆိုခံရဟူသူလေဟာ ယောင်ကြည်ဘဲဟူ သူဟုလဲ ဘီး ဖယ်သူရှိနှူး။

19 အယ်ကြောန့် သူးနို့လေဟာ ယောင်ကြည်ဘဲဟူကြော
န့် ဝမ်နိုင်ဘဲဇာဟို နို့လေသိရဂေဟယ်။

4

1 အယ်ကြောန့် ဘုရားသခင်ရဲ့ ငြိပ်ရှင်းထဲဟို ဝမ်ရဟူ
ခွမ်ဟို ပေးဟူ ဂဒိတော်ဟာ နို့လေမာရှိနေရဲ့န နန်းနို့ထဲဟ
ဝမ်စားရဘဲဟူသူ တယော့-က်လည်း မွှာဘဲနေအောန် ဒိ
ပြုဂေဇို။

2 ဖြားဖြစ်ကြောန့်နူးဆိုဟာ နို့လေလည်း အယ်သူလေ
မျိုး ဝန်းသာဇာ ဒန်းကောန်းဟို ကြားရဂေဘီ။ အယ်ဘေ
မဲ့ သူးနို့ကြားရဟူ ဒန်းကောန်းဟာ ယောင်ကြည်ရှင်းပါဘဲ
ကြောန့် သူးနို့တွပ် ကျိုးမြဟူ။

3 ယောင်ကြည်ဟူ နို့လေဟာ ဘုရားသခင် ဂဒိထားတော်
မူဟူ ငြိပ်ရှင်းထဲဟို ဝမ်ရဂေဟယ်။ အယ်မူတိုင်းဘဲ
ဗျာဒိတ်တော်ဟု၊

“သူးနို့လေဟာ ငါ့ရဲ့ ငြိပ်ရှင်းထဲဟို ဝမ်ရဂေဟု ဆိုဘီး
မျှစ်ထွပ်ဟူကြောန့် ငါကီဆိုဟယ်” ဆိုဘီး လာဟယ်။
ငြိပ်ရှင်း ဆိုဇာဟာ ကမ္ဘာဦးစဟု ဖန်ဆင်းဟူမူရာလေ ပီး
ဆောင်းဘီး ငြိပ်နားယူဟူ ငြိပ်ရှင်းဟို ဆိုလိုဟူဇာဖြစ်
ဟယ်။

4 ကျမ်းစာဟု ခွန်နစ်ရစ်မြော့-က်ဟူ နေနုပတ်သတ်ဘီး
“ဘုရားသခင်ဟာ ခွန်နစ်ရစ်မြော့-က်ဟူနေမာ သူ့ရဲ့မူရာ
လေ ရှိဟူမျှအားလောင်း ပီးစီးဟူကြောန့် ငြိပ်ဘီး နေ
တော်မူဟယ်” ဆိုဘီး လာလေဟယ်။

⁵ နှော-က်ဘီး “သူးနို့လေဟာ ငါ့ရဲ့ ငြိပ်ရှင်းထဲဟို့ ဝမ်ရ ဂေမယ် မူဟ” ဆိုဘီး အယ်နေရာမာ ဆိုဟူးဟယ်။

⁶ အယ်ကြောန့် အယ်မူ ငြိပ်ရှင်းထဲဟို့ ဝမ်ရဟူခွမ်ဟာ တချို့လူလေတွပ် ရှိသေးဟယ်။ ဝန်းသာဇာ ဒန်းကောန်း ဟို့ ပထမဦးဆောင်း ကြားရဟူသူလေဟာ ယောင်ကြည် ဂေဘဲကြောန့် ဝမ်ရဂေဟ။

⁷ အယ်ကြောန့် ဘုရားသခင်ဟာ နေ့တနေ့ဟို့ “အယ်နေ” ဆိုဘီး ဆစ်ဘီး ခုလမှတ်တော်မူဘီးဟာ နှော-က်နှစ်ပေါ် န်း ကြာလာဟူ ခီမာ စဟ ဖော်ပြဟူးဟူတိုင်း၊

“အယ်နေမာ နန်းနို့လေဟာ ဘုရားသခင်ရဲ့ ဗျာဒိတ်တော် သံဟို့ ကြားရဂေဟူကြောန့် ခိုင်မာဟူ စိန်လောင်း ရှိဂေန”

ဆိုဘီး ဒါဝိဒ်အားဖြင့် မိန့်တော်မူလေဟယ်။

⁸ တကယ်ဟို့ ယောရှုပေးဟူ ငြိပ်ရှင်းဟာ ဘုရားသခင် ဂဒိထားတော်မူဟူ ငြိပ်ရှင်း ဖြစ်ဟယ် ဆိုဟာ တခြား နေ့ ရစ်တရစ်ကြောန်းဟို့ မိန့်တော်မူဟို့ မူဟ။

⁹ အယ်မျိုးဖြစ်ကြောန့် ဘုရားသခင်ရဲ့ လူမျိုးတော်တွပ် ငြိပ်ရှင်း တမျိုးကျန်ရှိသေးဟယ်။

¹⁰ ဖြားဖြစ်ကြောန့်ဆို့ဟာ ဘုရားသခင်ဟာ သူ့ရဲ့ ဖန် ဆင်းဟူမှုရာလေ ပီးစီးဟူကြောန့် ငြိပ်ဘီး နေဟူမျိုး အယ်ငြိပ်ရှင်းထဲဟို့ ဝမ်ရဟူသူဟုလည်း ကိုယ့်ရဲ့မှုရာလေ ဟို့ ပီးစီးဟူကြောန့် ငြိပ်ဘီး နေရလေဟယ်။

¹¹ အယ်ကြောန့် သူးနို့ရဲ့ နာခံဘဲဟူ ပေါင်ဇံဟို့လိုက်ဘီး

ဖယ်သူတယော့-က်လည်း ပြိုလဲဘဲ အယ်ငြိပ်ရှင်းထဲဟို့
ဝမ်ရဟို့တွပ် ကြိုးစားအားထုဂေဇို။

12 ဘုရားသခင်ရဲ့ စကားတော်ဟာ သတ်ရှင်ရှင်း၊ တဂိုး
နပြုပြင်ရှင်း၊ သန်လျက်လေထတ် ထတ်ရှင်းမှုန ပုလဲဇော
င်ဟူကြောန့် သတ်န စိဝိညာဉ်ဟို့ဖြစ်ဖြစ်၊ ရိုးဆစ်န ခြင်ဆီ
ဟို့ဖြစ်ဖြစ် ပိုင်းခြားဘီး ထောက်ချင်းခွမ်းတတ်ဟယ်။ စိန
လောင်း ကြိစည်လေဟို့လည်း ထိုးထွမ်းဘီး သိမြင်နိုင်ဟ
ယ်။

13 ဘုရားသခင်ရဲ့ မျစ်မော့-က်တော်မာ ထန်ရှားဘဲဟူ
ဇာ ပြားဇာလည်း မေ့ဟူ။ ဖန်ဆင်းဟွားဟူ ရှိမျှဂူလောင်း
ဟို့ မျစ်မော့-က်တော်မာ ကွယ်ကာမော့ဘဲန လှန်ဟွားလေ
ဟယ်။ နို့လေဂူလောင်းဟာ ကိုယ်ပြုဟူ မှုရာလေရှိဟူမျှ
ကိုယ်တော်ရဲ့ စစ်ကြောစီရင်ဇာဟို့ ခံရဂေလေမယ်။

ကီးမြတ်ဟူ ယဇ်ပုရောဟိတ်မန်းဂီး ယေရှုကြောန်း

14 အယ်ကြောန့် ကောန်းဂန်ဘောင်ထဲဟို့ ကြွဝမ်တော်
မှုဟူ ယဇ်ပုရောဟိတ် မန်းဂီးဖြစ်ဟူ ဘုရားသခင်ရဲ့ သား
တော်ယေရှုဟာ နို့လေရဲ့ ယဇ်ပုရောဟိတ်မန်းဂီး ဖြစ်ဟူ
ကြောန့် နို့လေဟာ ယောင်ကြည်ဝန်ခံဟူ ရာလေဟို့ စွဲစွဲမြဲ
မြဲ ကိုင်ဆွဲဟွားဂေဇို။

15 နို့လေရဲ့ ယဇ်ပုရောဟိတ် မန်းဂီးဟာ နို့လေခံရဟူ
ဆင်းရဲ ဒေါက်ခလေကြောန့် ကြင်နာနိုင်ဘဲဟူသူ မှုဟူ။
နို့လေခံရဟူမျိုး စောင်ဇမ်း နှော့-က်ယှစ်ရှင်း မျိုးမျိုး

ဟို ခံစားဖူးဟူသူ ဖြစ်ဟုယ်။ အယ်ဘေမဲ့ ကိုယ်တော်ဟာ ဒုစရိုက်ပြစ်န လွတ်ကင်းတော်မူဟုယ်။

¹⁶ အယ်ကြောန့် နို့လေဟာ သနားကရုဏာတော်န မစ ရှင်းကျေးဇူးဟို ခံရဟိုတွပ် ရဲရင့်ဟူစိန ကျေးဇူးပလ္လင် တော် ခေရင်းဟို တိုးဝမ်ဂေဇို။

5

¹ လူလေထဲဟာ ဝီးကျော-က်ခံရဟူ ယဇ်ပုရောဟိတ်မန်း လေဟာ ပြစ်ဖြေဟူယဇ်န ပူဇော်သက္ကာလေဟို လူလေ ကိုယ်စား ဘုရားသခင်ဟို ဆစ်ကပ်ပူဇော်ဟိုတွပ် ခန့်အပ် ခံရဟူ သူဖြစ်ဟုယ်။

² သူဟာ ကိုယ်တိုင်အားနဲချစ် ရှိဟူကြောန့် မိုက်မဲဟူသူ၊ မှားယွင်းဟူသူလေဟို သီးခံဟိုတွပ် တတ်နိုင်လေဟုယ်။

³ အယ်ကြောန့်လည်းဘဲ သူများလေရဲ့ ပြစ်တွပ်ဘဲမှုဘဲ န သူပြစ်တွပ်လည်း ပြစ်ဖြေရာယဇ်ဟို ပူဇော်ရဟုယ်။

⁴ အယ်မျိုး ဂေါင်သရေရှိဟူ ရပ်ရာဟို ဖယ်သူလည်း ကိုယ့် ကိုယ် ကိုယ် ခံယူရဟူဇာ မူဟု။ အာရန်ဟူမျိုး ဘုရားသခင် ခေါ်ယူတော်မူဟူ ဇာအားဖြင့်ဘဲ ခံယူရရှိနိုင် ဟုယ်။

⁵ အယ်မျိုးဘဲ ခရစ်တော်ဟာ ယဇ်ပုရောဟိတ်မန်းရဲ့ ရပ်ရာဟို ကိုယ့်ကိုယ်ကိုယ် ချီးမြှော-က်ဟူ ဇာမှုဘဲန “နန်ဟာ ငါ့သား ဖြစ်ဟုယ်။

အယ်နေဘဲ ငါဟာ နန့်ရဲ့ ဖ ဖြစ်လာဟယ်” ဆိုဘီး မိန့်
တော်မူဟူ သခင်ဟာ ခရစ်တော်ဟို့ ချီးမြှောက်
တော်မူဟူ ဖြစ်ဟယ်။

⁶ တခြားကျမ်းလေမာလည်း

“နန့်ဟာ မေလခိဇေက်ဟူမျိုး*[†]

ထာဝရ ယဇ်ပုရောဟိတ် ဖြစ်ဟယ်” ဆိုဘီး ပြောဟား
ဟယ်။

⁷ ခရစ်တော်ဟာ လူ့ဇာတိန သတ်တော်ထန်ရှား ရှိနေဟူ
ခီဟု သူ့ဟို့ သေရှင်းဟုနေ ကယ်တန်နိုင်ဟူ ဘုရားသခင်
နားဟို့ ကြွေးကြော် မျစ်ရယ်ကုလဘီး ဆုတောင်းသနားခံ
ဟူကြောန့် အယ်မူ ကြည်ညိုမှုအားဖြင့် ဘုရားသခင်ဟာ
နားထောန်တော်မူဟယ်။

⁸ ကိုယ်တော်ဟာ ဘုရားသခင်ရဲ့ သားတော် ဖြစ်ဟူလ
ည်းဘဲ ဆင်းရဲဒေါက်ခဟို့ ခံဟူဇာအားဖြင့် နားထောန်ရှင်း
ကျိုးကြောန်းဟို့ သန်ယူတော်မူဘီး၊

⁹ စောင်လင်ရှင်းဟို့ ရော့-က်ဘီးမှ ယောင်ကြည်နား
ထောင်ဟူ သူလေဟို့ ထာဝရကယ်တန်ရှင်း ကျေးဇူးဟို့
ပြုဟူသူ ဖြစ်တော်မူဘီး၊

¹⁰ မေလခိဇေက်ဟူမျိုး† ယဇ်ပုရောဟိတ်မန်း ဆိုဘီး

* 5:6 **၅.၆** မေလခိဇေက်ဟူမျိုး၊ အယ်မျိုးမူဘဲနေဟာ
မေလခိဇေက်နတူဟယ်။ အယ်မျိုးမူဘဲနေဟာ မေလခိဇေက်ထံ
ဆင်းသတ်လာဟူမျိုးရိုး။ 5:7 **၅.၇** မ ၂၆.၃၆-၄၆; မာ ၁၄.၃၂-၄၂; လု
၂၂.၃၉-၄၆ † 5:10 **၅.၁၀** မေလခိဇေက်ဟူမျိုး၊ အယ်မျိုးမူဘဲနေဟာ
မေလခိဇေက်န တူဟယ်။ အယ်မျိုးမူဘဲနေဟာ မေလခိဇေက်ထံ
ဆင်းသတ်လာဟူ မျိုးရိုး။

ဘုရားသခင် သမုတ်ဇာဟို ခံရလေဟယ်။

ယောင်ကြည်ရှင်းဟို စွန့်ဘဲနေဟိုတွပ် ဒီပေးဟူကြော
န်း

¹¹ အယ်မူ မေလခိဇေဒက်ရဲ ကြောန်းဟို နို့လေ ပြောဇာ
ဘောင်ဂီး ရှိဟူလည်းဘဲ နန်းနို့လေဟာ ဉာဏ်နဲဟူကြောန်
ပြောပြရခတ်ဟယ်။

¹² တကယ်ဘဲ နန်းနို့လေဟာ ခီကာလလေ ကြာလာ
ဘီ ဖြစ်ဟူကြောန် ဆရာဖြစ်ဟို ရော့-က်သင့်ဟူလည်းဘဲ
ဘုရားသခင်ရဲ တရားတော်ဟို ခြေခံဟုနေစဘီး သူများ
လေနားမာ သန်ယူရဟိုကြောန်း ရှိဟူကြောန် ကြေခဲဟူစာ
ဟို စားနိုင်ဘဲန နို့ဟိုဘဲ သော့-က်ရဟူသူ ဖြစ်ဂေဟယ်။

¹³ နို့ဟိုဘဲ သော့-က်ဘီး သတ်ရှင်ဟူသူဟာ နို့စို့သားဂန်း
ဟား ဖြစ်ဟူကြောန် ဖြောန်မတ်ဟူ တရားန ရင်းနှီးကျွမ်း
ဝမ်ရှင်း မေ့ဟူ။

¹⁴ ကောန်းလော၊ ကောန်းဟုလော၊ ဆိုဇာဟို ပိုင်းခြား
ဘီး သိဟူဉာဏ်န လေ့ကျင့်ရှင်းရှိဘီး စောင်လင်ဟူ ရွယ်
ဟာ ကြေခဲဟူစားဇာဟိုဘဲ စားဂေဟယ်။

6

¹ အယ်ကြောန် နို့လေဟာ ခရစ်တော်န ဆိုင်ဟူ ခြေခံ
သွန်သန်ချစ်လေဟို ထားရစ်ဘီး စောင်လင်ရင့်ကျတ်ရှင်း
ဟို တတ်လှမ်းဂေဇို။ သေရှင်းန ဆိုင်ဟူကျင့်လေဟု နော
န်ဒရရှင်းလေ၊ ဘုရားသခင်ဟို ယောင်ကြည်ရှင်းလေ၊

2 ဗတုတိဇံ* နှ် ဆိုင်ဟူသွန်သန်ရှင်းလေ၊ လတ်တန်
မင်္ဂလာလေ၊ သေဟားဘီးသူလေ ရှင်ပုလန်ထမြော-က်
ဟူကြောင်းလေ၊ ထာဝရပြစ်ဒန်စီရင်ဟူ ကြောင်းရာလေ
ဟို့ ထပ်ဘီး ခြေပြုဘဲနေဂေဇို့။

3 ဘုရားသခင် ခွမ့်ပေးမယ် ဆိုဟာ နို့လေ အယ်မျိုး
လောက်ဂေမယ်။

4 လန်းရောန်ထဲဟို့ တခါရော-က်ဘီး၊ ကောင်းဂန် ဆု
ကျေးဇူးလေဟို့ မြဲစမ်းရဘီး၊ သန်ရှင်းဟူဝိညာဉ်တော်ဟို့
ခံယူဘီး၊

5 ဘုရားသခင်ရဲ့ ကောင်းမြတ်ဟူ စကားတော်န နှော-က်
ကပ်ကာလ တဂိုးလေဟို့ မြဲစမ်းရဘီးမှ၊

6 ရွေ့လျော့ ဘီး ဖော့-က် ပု လ န် ဟူ သူ လေ ဟာ
ဘုရားသခင် ရဲ့ သားတော် ဟို့ သူးနို့ ကိုယ်တိုင် လတ်
ဝါးကပ်တိုင်မာ ကွပ်မျစ်ဘီး လူလေရှေ့မာ ကဲ့ရဲ့ရှုတ်ခ
လဟူ သူလေဖြစ်ဟူကြောန့် နှော-က်ထပ် နှောန်ဒရရှင်းဟို့
ရော့-က်စေနိုင်ဟူ။

7 ဥပမာ မုလေဂီးဟာ သူထတ်ဟို့ ခါဘီးခါ ကုလဟူ မိုး
ရေဟို့ သော့-က်ဘီး စိုက်ပျိုးဟူသူလေတွပ် သီးနှံလေဟို့
ဖြစ်ထွန်းစေတတ်ဟယ် ဆိုဟာ ဘုရားသခင်နားဟု ကော
န်းဂျီးမင်္ဂလာဟို့ ခံစားရဟယ်။

8 အယ်ဘေမဲ့ အယ်မုလေဂီးဟာ ဆူးဗန်မျိုးမျိုးဟို့
ပေါက်စေဟယ် ဆိုဟာ သောင်းဇားမရဘဲကြောန့် ကြာ

* 6:2 ၆.၂ ဗတ္တိဇံ၊ အယ်မျိုးမှုဘဲနေဟာ စင်ကြယ်ရှင်း ခမ်းနားလေ။

ခန်မာ ကီရှင်းဟိုခံရဘီး နော-က်ဆောင်းမာ မီးရှို့ရှင်းခံရ
လေဟယ်။

⁹ ရှစ်ရဟူ ညီကို မောန်နှမလေ နို့လေအယ်မျိုးပြောဟူ
လည်းဘဲ နန်းနို့တွပ်ဟု ကယ်တန်ရှင်းန ဆိုင်ဟူဇာလေ၊ ပို
ဘီး ကောန်းဟူဇာလေန ဆိုင်ဟယ် ဆိုဇာဟို နို့လေ ယောင်
ကြည်စိခလဂေဟယ်။

¹⁰ ဖြားဖြစ်ကြောနန်းဆိုဟာ နန်းနို့လေဟာ သန်ရှင်းဟူ
သူလေဟို ရင်းရင်းဒူးဟု လောက်ကျွေးပြုစုဟူမျိုးဘဲ ခု
လည်း လောက်ကျွေးပြုစုဘီး ကိုယ်တော်ရဲ့ နာမတော်ဟို
ထော့-က်ဘီး နန်းနို့ပြဟူ ရှစ်ရှင်းမြစ်တာလေဟို မေ့ဟား
ရလော့-က်အောန် ဘုရားသခင်ဟာ တရားဘဲဟူသခင် မူ
ဟူ။

¹¹ နန်းနို့ ယော့-က်စီတိုင်းဟာ မျှော်လင့်ရှင်းနဆိုင်ဟူ စိ
ခလမူ ပုလဲပုလဲဝဝရှိဂေဟိုတွပ်န အယ်မျိုး စိအားထတ်
သန်ရှင်းဟို ဆောင်းထိ ပြနိုင်ဟိုတွပ် နို့လေလိုရှင်ပါဟယ်။

¹² အယ်မျိုး နန်းနို့လေဟာ ပျင်းဂေဘဲန ကြိုးစားအား
ထုဘီး ယောင်ကြည်ရှင်း၊ စိရှယ်ရှင်းအားဖြင့် ဂဒိတော်ဟို
မို့ဆစ်ခံဟူသူလေ ဖြစ်ဂေဟိုတွပ် ဖြစ်ဟယ်။

စိခလရဟူ ဂဒိတော်ကြောန်း

¹³ ဘုရားသခင်ဟာ အာမြဟံဟို ဂဒိပေးဟူ ခီမာ
တိုင်တည်ကီဆိုဟိုတွပ် သူထတ်ကီးမြတ်ဟူသူ မေ့ဘဲဟူ
ကြောနဲ့ ကိုယ့်ကိုယ်ကိုယ် တိုင်တည်ကီဆိုတော်မူဘီး၊

14 “ငါဟာ နန့်ဟို မြဲဒမ်းကောန်းဂျီးပေးဘီး နန့်ရဲ မျိုး နွယ်ဟို ပွားများစေမယ်” ဆိုဘီး မိန့်တော်မူဟယ်။

15 အယ်မျိုး အာမြဲဟံဟာ စိရှယ်ရှယ်န စောန့်နေဟူ ကြောန့် ဂဒိတော်ဟို ခံစားရလေဟယ်။

16 လူလေဟာ ကိုယ့်ထတ်ကီး မြတ်ဟူ သူလေဟို တိုင်တည်ကီဆိုလေ့ရှိဘီး အယ်မျိုး တည်ပြုပြောဆိုဟူ ဂဒိသစ်စဟာ ရှင်းရှင်း ငြင်းခူမှုဟို ငြီးအေးစေတတ်ဟယ်။

17 အယ်ကြောန့် ဂဒိတော်ဟို မွီခံရဟူသူလေဟာ ဘုရားသခင်ရဲ့ ကြံစည်တော် ဖော့-က်ပုလန်ဘဲဟူ ကြောန့်ဟို သိရဟိုတွပ် ဘုရားသခင်ဟာ ကီဆိုရှင်းအားဖြင့် အာမခံတော်မူလေဟယ်။

18 ဖြားဖြစ်ကြောန့်နူးဆိုဟာ ဘုရားသခင်ဟာ မုသားသောင်းနိုင်ဘဲဟူ ရာဖြစ်ဟူ ဖော့-က်ပုလန်ဘီး ပုလောန်းလဲနိုင်ဘဲဟူ ရာနေ့ပါးဟို မွီပြုဘီး ကိုယ့်ရှေ့မာ ထားဟားဟူ မျှော်လင့်ရာဟို ခိုလုံဟိုတွပ် ပုလေးဟူနို့လေဟာ သတ်သာမှု ကီးကီးမားမား ရဟိုတွပ် ဖြစ်ဟယ်။

19 အယ်မျှော်လင့်ချစ်ဟာ နို့လေရဲ့စိဝိညာဉ်တွပ် မြဲမြဲခိုင်ခန့်ဟူ စိနှလောင်းရဲ့ ကုလော့-က်ဆူးဟူမျိုး နို့လေမာရှိဘီး ဗိမာန်တော်လိုက်ကာထဲဖတ်ဟို ဝမ်ရော့-က်လေဟယ်။

20 မေလခိဇေဒက်ဟူမျိုး† ထာဝရ ယဇ်ပုရောဟိတ်မန်း ဖြစ်ဟူ ယေရှုဟာ နို့လေတွပ် အယ်ဌာနတော်ထဲဟို ရှေ့

† 6:20 ၆.၂၀ မေလခိဇေဒက်ဟူမျိုး (ရှု ၅.၆)။

ဆောန်ဘီး ဝမ်ဟူသူဖြစ်လေဟယ်။

7

ယဇ်ပုရောဟိတ် မေလခိဇေဒက်ကြောန်း

¹ အယ်မူ မေလခိဇေဒက်ဟာ ရှာလင်မန်းဂီးဖြစ်ဘီး မြင့်ဆောင်းဖြစ်ဟူ ဘုရားသခင်ရဲ့ ယဇ်ပုရောဟိတ်ဖြစ်ဟယ်။ သူဟာ မန်းဂီးလေးပါးဟို့ စစ်နိုင်ဘီး ပုလန်လာဟူ အာဗြဟံဟို့ ခရီးဦးကြိုပြုဘီးဟာ ကောင်းရျီးပေးဟူသူ ဖြစ်ဟယ်။

² အာဗြဟံဟာ သူတိုက်ယူလာဟူ အောက်စာပစ်စီးလေရဲ့ ဆယ်ဖို့တဖို့ဟို့ သူဟို့ ပေးလှူလေဟယ်။ (မေလခိဇေဒက် ဆိုဘီး ခေါ်ဟူ နာမယ်ရဲ့ ဓိပါယ်ဟာ “ဖြောင့်မတ်ရှင်းရဲ့ မန်းဂီး” ဖြစ်ဟယ်။ သူဟာ ရှာလင်မြို့ရဲ့ မန်းဂီးလည်း ဖြစ်ဟူကြောင့် သူ့နာမယ်ဟာ “ငြိသတ်ရှင်းရဲ့ မန်းဂီး” ဆိုဘီးလည်း ဓိပါယ်ရလေဟယ်။)

³ သူ့မာ ဖလည်း မွေဟု။ မိလည်း မွေဟု။ ရှေးမျိုးရိုး စဉ်ဆစ်လည်း မွေဟု။ သတ်တာရဲ့ စလည်း မွေဟု။ ဆောင်းလည်း မွေဘဲဟု။ ဘုရားသခင်ရဲ့ သားတော်နတူဘီး ယဇ်ပုရောဟိတ်ရာမာ မြဲဒမ်း တည်လေဟယ်။

⁴ နို့မျိုးနွယ်လေရဲ့ ထန်ရှားဟူဖ အာဗြဟံဟာ စစ်ပွဲဟုနေ သီးယူရလာဟူ အောက်စာပစ်စီးလေဟို့ ဆယ်ဖို့တဖို့လှူဟူကြောင့် သူလူဇာဟို့ ခံယူဟူ အယ်မန်းဂီးဟာ ဖယ်လော့-က် ကီးမြတ်မယ် ဆိုဇာဟို့ ဆင်ခြင်ကေ့ဂေ့ပါ။

5 ယဇ်ပုရောဟိတ်ရပ်ရာဟို့ ခံရဟူ လေဝိသားလေဟာ အာဗြဟံအမျိုးဖြစ်ဟူ သူးနှိရဲ့ ညီကို မောန်နှမလေလတ် ဟု ပညတ်တရားတိုင်း ဆယ်ဖို့တဖို့ဟို့ ခံယူရဟူခွမ် ရှိဂေ ဟယ်။

6 မေလခိဇေဒက်ဟာ လေဝိမျိုးနွယ် မှဘဲဟူလည်းဘဲ အာဗြဟံနားဟု ဆယ်ဖို့တဖို့လူဟို့ ခံယူဘီး ဘုရားသခင်ရဲ့ ဂဒိတော်ခံရဟူ အာဗြဟံဟို့လည်း ကောင်းဂျီးပေးလေဟယ်။

7 ကီးဟူသူဟာ ငယ်ဟူသူဟို့ ကောင်းဂျီးပေးတတ်ဟူဇာ ဟို့ ဂြင်းခူဇာကြောန်းမေ့ဟူ။

8 အယ်နေရာမာ သေတတ်ဟူသူလေဟာ ဆယ်ဖို့တဖို့ ဟို့ ခံယူလေ့ရှိဟယ်။ အယ်မူခီမာဟု သတ်ရှင်ဟယ် ဆိုဘီး သတ်သေခံဟူဇာဟို့ ရဟူသူဟာ ဆယ်ဖို့တဖို့ဟို့ ခံရဟယ်။

9 အယ်ကြောန့် ဆယ်ဖို့တဖို့ခံယူဟူ လေဝိဟာ အာဗြဟံ အားဖြင့် ဆယ်ဖို့တဖို့ဟို့ ပေးလူဟယ် ဆိုဘီး ပြောဟုံရဟယ်။

10 ဖြားဖြစ်ကြောန့်နူးဆိုဟာ အာဗြဟံဟာ မေလခိဇေဒက်နို့တို့ဟူ ခီမာ မွီးဖွားလာမယ့်လေဝိဟာ သူဖအာဗြဟံရဲ့ ကိုယ်ထဲမာ ရှိနေဟူကြောန့်ဖြစ်ဟယ်။

11 လူလေဟာ လေဝိနွယ်နဆိုင်ဟူ ယဇ်ပုရောဟိတ် ရပ်ရာထတ်မာ ခြေခံဘီး ပညတ်တရားဟို့ ခံရဂေဟူဖြစ်ကြောန့် အယ်မျိုးနွယ်အားဖြင့် စောင်လင်ရှင်းဟို့ရော-က်မယ် ဆိုဟာ အာရုန်နတူဟူ ယဇ်ပုယောဟိတ်မျိုးမှဘဲန

မေလခိဇေဒက်ဟူမျိုး* ယဇ်ပုရောဟိတ်ဟာ နှော-က်ထပ် ပေါ်ထွပ်လာဟို့ ဖယ်မျိုးလိုအူးမယ်နူး။

12 ယဇ်ပုရောဟိတ်အမျိုး ပုလောန်းလဲတတ်ဟယ် ဆိုဟာ ပညတ်တရားဟာ ပုလောန်းလဲဘဲန နေဟူ။

13 နို့လေရဲ့ သခင်ဘုရားဟာ လေဝိနွယ်ဝမ် မူဟ၊ တခြားမျိုးနွယ်ဟု ဆင်းသတ်ဟူသူဖြစ်ဟယ်။ အယ်ကြောန့် တခြားမျိုးနွယ်လေဟာ ယဇ်ပလ္လင်ဝတ်ဟို့ တယော့-က်မှလည်း လောက်ဆောန်ဖူးဇာ မူဟ။

14 ပြားဖြစ်ကြောန့်နူးဆိုဟာ နို့လေရဲ့သခင်ဟာ ယုဒမျိုးနွယ်ထဲဟုနေ ပေါ်ထွပ်လာဟယ် ဆိုဇာ ထန်ရှားပါဟယ်။ ယဇ်ပုရောဟိတ်ရာဟာ ယုဒမျိုးနွယ်န စပ်ဆိုင်ဟယ် ဆိုဇာဟို့ မောရှေဟာ တခွန်းလည်းဘဲ ပြောဟူ။

မေလခိဇေဒက်နတူဟူ ယဇ်ပုရောဟိတ်ကြောန့်:

15 နှော-က်ဘီး မေလခိဇေဒက်နတူဟူ တခြားယဇ်ပုရောဟိတ်တပါး ပေါ်ထွပ်လာဟယ် ဆိုဟာ ယဇ်ပုရောဟိတ်အမျိုး ပုလောန်းလဲဟားဘိ ဆိုဇာ ပိုဘီးထန်ရှားဟယ်။

16 အယ်သခင်ဟာ ကိုယ်ခန္ဓာနစပ်ဆိုင်ဟူ ပညတ်တရားတိုင်း ခန့်ဟားဇာမူဘဲ ပျစ်စီးနိုင်ဘဲဟူ ထာဝရသတ်ရဲ့ တဂိုးအာနဘော်တော်အားဖြင့် ယဇ်ပုရောဟိတ်ရာမာ ခန့်ဟားဇာဖြစ်ဟယ်။

* 7:11 ၇.၁၁ မေလခိဇေဒက်ဟူမျိုး (၅၅ ၅.၆)။

17 ဖြားဖြစ်ကြောနဲ့နဲ့ဆိုဟာ ကျမ်းစာတော်ဟု “နန်ဟာ မေလခိဇေက်ဟူမျိုး† ထာဝရ ယဇ်ပုရောဟိတ် ဖြစ်ဟု ယ်” ဆိုဘီး သတ်သေခံဟားလေဟယ်။

18 ရင်းရင်းဒူးဟု ပညတ်ဟောင်းဟာ အားနဲဘီး ဖယ်သူ့ ဟိုမှလည်း စောင်လင်ရှင်းဟို ရှေး-က်စေနိုင်ဘဲကြောနဲ့ ပယ်ဖျစ်ဟူ ဇာဟို ခံရဟယ်။

19 မောရှေရဲ့ ပညတ်တရားဟာ အားမဲ့ဘဲ ကျိုးဟိုပေး နိုင်ဘဲကြောနဲ့ ဖယ်ရှားဟူဇာဟို ခံရဟယ်။ အယ်ဘေမဲ့ ခုခီ မာ နို့လေဟာ အယ်ပညတ်တရားထတ် ပိုဘီး ကောန်းဟူ မျှော်လင့်ရှင်းခွမ် ရဘိဖြစ်ဟူကြောနဲ့ အယ်မူ မျှော်လင့် ရှင်းအားဖြင့် ဘုရားသခင် နားဟို တိုးဝမ်ချဉ်းကပ်ဂေဟု ယ်။

20 အယ်လော့-က်နမကဟု အယ်မူမူရာဟာ ဂဒိသစ်စ ပြုဟူဇာပါဘဲန ဖြစ်လာဟူဇာ မူဟု။ ဖြားဖြစ်ကြောနဲ့နဲ့ဆို ဟာ တခြား ယဇ်ပုရောဟိတ်လေဟာ ဂဒိသစ်စပြုဟူ ဇာ ပါဘဲ ယဇ်ပုရောဟိတ်လေ ဖြစ်လာဂေဟယ်။

21 ကိုယ်တော့်ဟို မိန့်တော်မူဟူဇာဟု
 “နန်ဟာ ထာဝရ ယဇ်ပုရောဟိတ် ဖြစ်ရမယ်” ဆိုဘီး
 ဘုရားသခင် ဂဒိပေးတော်မူဟူကြောနဲ့
 ကိုယ်တော်ဟာ သူရဲ့ ဂဒိဟို ပုလောန်းလဲလေ့မယ် မူဟု”
 ဆိုဘီး ဂဒိသစ်စပြုဘီး ကိုယ်တော့်ဟို မိန့်တော်မူ
 ဟူ ဇာအားဖြင့် ယဇ်ပုရောဟိတ် ဖြစ်လာဟယ်။

† 7:17 ၇.၁၇ မေလခိဇေက်ဟူမျိုး (ရှု ၅.၆)။

22 အယ်မျိုး ကွာခြားမှုရှိဟူကြောင့် ယေရှုဟာ ပိုဘီး မြတ်ဟူ ပဋိညာဉ်တရားသစ်ရဲ့ အာမခံ ဖြစ်တော်မူဟယ်။

23 တခြား ယဇ်ပုရောဟိတ်လေဟာ သေရှင်းတရားအားဖြင့် တာဝန်ဟို့ ဆစ်ဘီး ထမ်းဆောင်နိုင်ဘဲဟူကြောင့် ယဇ်ပုရောဟိတ်လေ တဘောင်ဂီး ဖြစ်လာဂေဟယ်။

24 အယ်ဘေမဲ့ ယေရှုဟာ နိစ္စထာဝရ သတ်ရှင်ဟူကြောင့် ပုလောန်းလဲဘဲဟူ ယဇ်ပုရောဟိတ်ရာဟို့ ရရှိလေဟယ်။

25 အယ် ကြော့န့် ကိုယ်တော်ဟာ သူ့အားဖြင့် ဘုရားသခင်နားဟို့ ချဉ်းကပ်ဟူ သူလေဟို့ ပုလဲပုလဲဝဝ ကယ်တန်နိုင်လေဟယ်။ ဖြားဖြစ်ကြော့န့်နူးဆိုဟာ ကိုယ်တော်ဟာ အယ်သူလေတွပ် ဘုရားသခင်နားမာသနားခံဟို့တွပ် ထာဝရ သတ်ရှင်တော်မူဟူကြောင့် ဖြစ်ဟယ်။

26 အယ်မျိုး ယဇ်ပုရောဟိတ်မန်းဟာ သန်ရှင်းစင်ကြယ်ဘီး ညစ်ကျေးမဲ့ဘဲ ပြစ်ရှိဟူ သူလေန ဆစ်ဆံဘဲဟို့ ကောန်းဂန်သားလေထတ် မြင့်မြတ်ဟူ သူဖြစ်ဟူကြော့န့် နို့လေန သင့်တော်လေဟယ်။

27 တခြား ယဇ်ပုရောဟိတ်မန်းလေဟာ ကိုယ့်ပြစ်တွပ်န သူများပြစ်လေတွပ် နေ့တိုင်း ယဇ်ပူဇော်ရဟူမျိုး အယ်သခင်ဟာ ယဇ်ပူဇော်ဇာကြော့န့် မေ့ဟူ။ ဖြားဖြစ်ကြော့န့်နူးဆိုဟာ သူ့ကိုယ်ဟို့သူ တခါဒဲန ပီးဆောင်းအောန် ယဇ်ပူဇော်ဟူ ဇာအားဖြင့် အယ်မူ မူဟို့ ပီးစီးစေတော်မူဟယ်။

28 မောရှေရဲ့ ပညတ်တရားဟာ အားနဲဘီး စောင်

လင်ဘဲဟူ သူလေဟို့ ယဇ်ပုရောဟိတ်ရာမာ ခန့်ဟွား
ဟယ်။ အယ်ဘေမဲ့ ပညတ်တရားနော-က်မာ ထာဝရ
ကာလပတ်လောင်း စောင်လင်တော်မူဟူ သားတော်ဟို့
ယဇ်ပုရောဟိတ်မန်းဖြစ် ကီဆိုတော်မူဟူ ဗျာဒိတ်တော်
အားဖြင့် ခန့်ဟွားတော်မူဟယ်။

8

ပဋိညာဉ်တရားသစ်ရဲ့ ယဇ်ပုရောဟိတ်မန်းကြောင်း

¹ ခုပြောဟူ ကြောင်းရာလေရဲ့ ဓိကချစ်ဟု အယ်မျိုး
ယဇ်ပုရောဟိတ်မန်းဟာ နို့လေမာရှိဟယ်။ ကောင်းဂန်
ဘောင်မာ အနန္တတဂိုးရှင်ရဲ့ ပလ္လင်တော် ညာဖတ်မာ ထိုင်
နေတော်မူဘီးဟာ။

² လူလေဆော့-က်ဟူ ဇာမူဘဲ ဘုရားသခင် ဆော့-က်
တော်မူဟူ၊ တဲတော်စစ်မှန်ဖြစ်ဟူ သန်ရှင်းရာဌာနထဲမာ
ကိုယ်တော်ဟာ မူဆောန်တော်မူလေဟယ်။

³ ယဇ်ပုရောဟိတ်မန်းဆိုဇာဟာ ပူဇော်သက္ကာန ယဇ်
ဟို့ပူဇော်ဟို့တွပ် ခန့်ဟွားသူဖြစ်ဟူကြောန့် နို့လေရဲ့
ယဇ်ပုရောဟိတ်မန်းမာလည်း ပူဇော်ဆစ်သဟို့တွပ် ယဇ်
တခုခုရှိရဟယ်။

⁴ ကိုယ်တော်ဟာ အယ်လောက မုလေဂီးထတ်မာရှိမယ်
ဆိုဟာ ယဇ်ပုရောဟိတ် လောက်ဇာကြောင်း မေ့ဟူ။ ဖြား
ဖြစ်ကြောန့်နူးဆိုဟာ ပညတ်တရားတိုင်း ပူဇော်သက္ကာ
ဟို့ ဆစ်ကပ်ဟူ ယဇ်ပုရောဟိတ်လေဟာ လောကမာ တ
ဘောင်ဂီး ရှိဂေ့ဟူကြောန့်ဖြစ်ဟယ်။

5 မောရှေဟာ တဲတော်ဟို ဆော့-က်ဟိုလောက်ဟူခီဟ
 “တောန်ထတ်မာ နန့်ဟို ငါပြဟူပေါင်စံတိုင်း ဂူလောင်းဟို
 လောက်ဟိုတွပ် ဒိပြပါ” ဆိုဘီး ဗျာဒိတ်တော်ဟို ခံရဟူ
 ဇာဖြစ်ဟူကြောန့် အယ်မူ ယဇ်ပုရောဟိတ်လေဟာ ကော
 န်းဂန်ထတ်မာရှိဟူ ရာလေရဲ့ နမူနာ ပေါင်ရိနဆိုင်ဟူ ဝတ်
 ဟို စေခံလောက်ဆောန်နေဂေဇာ ဖြစ်ဟယ်။

6 အယ်ဘေမဲ့ ခုခီမာ ယေရှဟာ ပိုဘီး မြတ်ဟူ ဂဒိတော်
 လေနတည်ဘီး ပိုဘီး မြတ်ဟူ ပဋိညာဉ်တရားရဲ့ အာမခံ
 ဖြစ်ဟူကြောန့် ပိုဘီး မြတ်ဟူ ယဇ်ပုရောဟိတ်ခွမ်ရာဟို ရ
 တော်မူဟယ်။

7 တကယ်ကြောန့် ပထမပဋိညာဉ်တရားဟု ပြစ်တန်ခွမ်
 န လွတ်ကင်းမယ် ဆိုဟာ ဒုတိယပဋိညာဉ်တရားဟာ တ
 ည်ဟိုလိုအပ်ဟု။

8 အယ်ဘေမဲ့ ဘုရားသခင်ဟာ သူလူမျိုးလေဟို ပြစ်
 တန်ဘီး မိန့်တော်မူဟူဇာဟု

“ဣသရေလမျိုးသားန ယုဒမျိုးသားလေတွပ်
 ပဋိညာဉ်တရားသစ်ဟို ငါပြဟူခီကာလ ရော့-က်
 လေ့မယ်။

9 အယ်ပဋိညာဉ်ဟာ သူးနို့ဘိုးဘေးလေဟို
 အဲဂုတုတုပြည်ဟုနေ လတ်ဆွဲဘီး ငါခေါ်ဆောန်လာ
 ဟူခီဟု

သူးနို့လေဟို ပေးဖူးဟူ ပဋိညာဉ်နတူဟို မူဟု။

သူးနို့လေဟာ ငါပေးဟူပဋိညာဉ်န တည်ဂေဘဲကြော
န့် ငါ ဘုရားသခင်လည်း သူးနို့လေဟို ကေ့ရှဘဲနေ
ဟယ်။

10 နော-က်တခီမာ

ကုသရေလမျိုးသားလေဟို ငါပေးမယ့် ပဋိညာဉ်တ
ရားဟု

ငါဘုရားသခင်ဟာ ငါ့ပညတ်လေဟို သူးနို့လေရဲ့စိဝိညာဉ်
ထဲဟို သွမ်းမယ်။

သူးနို့လေရဲ့ နှလောင်းမာ ရေးဟားမယ်။

ငါဟာ သူးနို့လေရဲ့ ဘုရားဖြစ်ဘီး

သူးနို့လေဟာ ငါရဲ့လူမျိုးတော် ဖြစ်ဂေလေ့မယ်။

11 ဖယ်သူလေဟုမှ ကိုယ့်မျိုးသားရှင်းဘဲဖြစ်ဖြစ်၊

ညီကိုရှင်းရှင်းဟဘဲဖြစ်ဖြစ်၊

‘ဘုရားသခင်ဟို သိဘဲလော’ ဆိုဘီး သွန်သန်ပေးဟို
လိုဟု။

ဖြားဖြစ်ကြောန့်နူးဆိုဟာ ငယ်ဆောင်းဟုနေဘီး ကီး
ဆောင်းထို

အယ်သူလေ ဂူလောင်းဟာ ငါ့ဟို သိကျွမ်းဂေလေ့
မယ်။

12 ဖြားဖြစ်ကြောန့်နူးဆိုဟာ ငါဟာ သူးနို့ရဲ့ ပြစ်လေဟို
သီးခံမယ်။

သူးနို့လေရဲ့ တရားဘဲဟူ ဇာလေဟို အော့-က်မေ့ဘဲ
န နေမယ်” ဆိုဘီး မိန့်တော်မူဟယ်။

13 ဘုရားသခင်ဟာ ပဋိညာဉ်သစ် ဆိုဘီး မိန့်တော်မူဟူဇာ
ဟု ပထမပဋိညာဉ်တရားဟို့ ဟောင်းစေတော်မူကြောန့် ဖြ
စ်ဟယ်။ ရွှေ့လျော့ဘီး ဟောင်းနွမ်းဟူးဟူ ဇာဟာ ကြာ
ခန်မာ ပျော့-က်ကွယ်ဟူးလေ့မယ်။

9

လောကသားလေ ဝတ်ပြုကိုးကွယ်ဟူကြောန်းန ကော
န်းဂန်သားလေ ဝတ်ပြုကိုးကွယ်ဟူကြောန်းန

1 တနည်းဟု ပထမပဋိညာဉ်တရားဟာ ဝတ်ပြုရှင်းနဆို
င်ဟူ စီရင်ပြဋ္ဌာန်းချစ်ဘဲဖြစ်ဖြစ်၊ လောကီ သန့်ရှင်းရာဌာန
တော်နဖြစ်ဖြစ် စပ်ဆိုင်လေဟယ်။

2 ဖြားဖြစ်ကြောန်းနူးဆိုဟာ တဲတော်ဟို့ ပြင်ဆင်ရာမာ
သန့်ရှင်းဆောင်းဌာန ဆိုဘီး ခေါ်ဟူ ပထမခန်းထဲမာ ဆီမီး
ခေါင်၊ ဗွဲ၊ ရှေ့တော်မုန ပြင်ဆင်ဟူးလေဟယ်။

3 ဒုတိယ လိုက်ကာ နှော့-က်မာ ရရာတိုင်း သန့်ရှင်း
ဆောင်းတဲတော် ဆိုဘီး ခေါ်ဟူ ခန်းရှိဟယ်။

4 အယ်ထဲမာ နံသာလေဟို့ မီးရှို့ဟူ ရွှေယဇ်ပလ္လင်န ရွှေ
နမ္မန်းမံဟူးဟူ ပဋိညာဉ်သစ်တာရှိဟယ်။ အယ်သစ်တာ
ထဲမာ မနုနမုထုံဟူးဟူ ရွှေအိုး၊ ဖူးထွပ်ဟူ အာရန်ရဲလုံတံ
န ပဋိညာဉ် ကုလော့-က်ပုလားလေရှိဟယ်။

5 အယ်မူ သစ်တာထတ်မာ ဖောင်းကီးဟူ ခေရုဗိမ်လေ
ဟာ ပြစ်ဖြေရာပလုလင်ဟို့ အောက်မိုးဟူးဂေ့ဟယ်။
အယ်ရာလေဟို့ ခု သေးသေချားချာ ပြောပြဟို့ မရဟူ။

6 အယ်မျိုး ရှိမျှဂူလောင်းလေဟို့ ပြင်ဆင်ဘီးခီမာ ယဇ်ပုရောဟိတ်လေဟာ တဲတော် ပထမခန်းထဲဟို့ဝမ်ဘီး ဝတ်ပြုဟူမရာဟို့ နေ့တိုင်း လောက်ဆောန်ရဂေဟယ်။

7 အယ်ဘေမဲ့ ဒုတိယခန်းထဲဟို့ ယဇ်ပုရောဟိတ်မန်း တ ပါးဒဲဘဲ သူ့တွပ်န သူများလေရဲပြစ်တွပ် ပူဇော်ဟူ သွီးဟို့ ယူဘီး တနှ်မာ တခါဒဲဘဲ ဝမ်ရလေဟယ်။

8 တဲတော်ရဲ ပထမခန်း ရှိနေဟူ ကာလပတ်လောင်း သန်ရှင်းဆောင်းဌာနတော်ဟို့ သွားဟူလမ်း ပွမ့်သေးဘဲ ကြောန်းဟို့ သန်ရှင်းဟူဝိညာဉ်တော်ဟာ အယ်ဇာအားဖြင့် ရံဟို့ ပေးလေဟယ်။

9 အယ်တဲတော်ဟာ မျစ်မော့-က်ကာလပတ်လောင်း တွပ် ပေါင်ဥပမာ ဖြစ်ဘီး ပူဇော်ဟူ ပူဇော်သကာန ယဇ် လေဟာ ကိုယ့်ကိုယ်ကိုယ် သိဟူစိဟို့ ထော့-က်မယ် ဆို ဟာ ဝတ်ပြုဟူသူဟို့ စောင်လင်ဟူ ကျိုးဟို့ ပေးနိုင်ဘဲ ကြောန်းဟို့ ဖော်ပြဟူဇာ ဖြစ်ဟယ်။

10 အယ်မူဇာလေဟာ စားဇာ၊ သော့-က်ဇာန ဆေးကြော ရှင်း ဘောန်းဇာင် ဖြစ်ဟူ၊ ကိုယ်ခန္ဓာနဆိုင် ဟူ စီရင် ထောင်းဖွဲလေနတူးဒူ သစ်ပြုပြင်ဟူ ကာလထံဘဲ တည်ရှိ နေဇာဖြစ်ဟယ်။

11 ခုဆိုဟာ လူ့လတ်န လောက်ဘဲ၊ အယ်လောကန ဆိုင်ဘဲ ပိုဘီး ကောန်းမြတ် စောင်လင်ဟူ တဲတော်မာ ရော့-က်လာပီးဘီ ဖြစ်ဟူ* နော့-က်မင်္ဂလာကျိုးလေရဲ

* 9:11 ဇ.၁၁ ရော့-က်လာပီးဘီဖြစ်ဟူ၊ တချို့ မူရင်းလတ်ရေးမူလေမာ လာနေဟယ်၊ ဆိုဘီး ပါရှိဟယ်။

ယဇ်ပုရောဟိတ် မန်းဂီးဖြစ်ဟူ ခရစ်တော်ဟော။

12 နို့လေတွပ် ဘဲသွီး၊ နွားသားဂန်းရဲ့ သွီးနမူဘဲ သူရဲ့ သွီးတော်န သန်ရှင်းဆောင်း ဌာနထဲဟို့ တခါဒဲ ဝမ်တော်မူ ဘီး ထာဝရ ဝီးနုကယ်တန်ရှင်း ကျေးဇူးဟို့ သတ်ရော-က် စေ လေဟယ်။

13 ဖြားဖြစ်ကြောနွန်းဆိုဟော ညစ်ကျေးရှိဟူ သူလေဟို့ ဖျန်းဟူ နွားသွီး၊ ဘဲသွီး၊ နွားမဒန်းဟားရဲ့ ပုလာဟော သူး နို့လေရဲ့ ကိုယ်ကာယဟို့ စင်ကြယ်သန်ရှင်းမှု ပေးနိုင်မယ် ဆိုဟော။

14 အယ်လော့-က်နမကဟု ပြစ်တန်ဇာမေ့ဘဲဟူ ကိုယ် တော်ဟို့ ထာဝရ ဝိညာဉ်တော်အားဖြင့် ဘုရားသခင် ရှေ့ တော်နှိုက် တန်လူပူဇော်ဟူ ခရစ်တော်ရဲ့ သွီးတော်ဟော သေရှင်းန စပ်ဆိုင်ဟူ ကျင့်ဟို့ ပယ်ရှင်းဘီး နန်းနို့လေ ဟော သတ်ရှင်တော်မူဟူ ဘုရားသခင်ဟို့ ဝတ်ပြုဟို့ကြော န်းကြောန့် ကိုယ့်ကိုယ်ကိုယ် သိဟူစိ ကြည်လင် သန်ရှင်း စေဟို့တွပ် ပိုဘီး တတ်နိုင်တော်မူဟယ် မူဟုလော။

15 အယ်ကြောန့် ပထမ ပဋိညာဉ်တရား လတ်ထတ်မာ ပြစ်မှားဟူ ပြစ်ဟို့လည်း လွတ်ဟို့တွပ် ခရစ်တော်ဟော ကြားဝမ်စေစပ်ဘီး သေခံတော်မူဟူကြောန့် ခေါ်တော်မူ ဟူ သူလေဟော ဂဒိတော်နယှဉ်ဟူ ထာဝရမို့ဟို့ ခံရဟို့တွပ် အယ်သခင်ဟော ပဋိညာဉ်တရားသစ်ရဲ့ အာမခံ ဖြစ်တော် မူဟယ်။

16 မို့ခံရဟို့ ခွံမ့်ဟို့ ပေးဘီး စာချောက်ချောက်ဟူ မူရာ

မလည်း စာချောက်တည်ဟယ် ဆိုဟာ စာချောက်ချောက်
ဟူ သူဟာ တကယ်သေဟူးဘီ ဖြင့်ဟူကြောင်း ထော့-က်
ထားပြီဟို့ လိုအပ်ဟယ်။

17 တကယ်ကြောန့် သတ်ရှင်နေသေးဟာ အယ်စာချော
က်ဟာ တည်ဟု သေမှဘဲ တည်ဟူဇာ ဖြစ်ဟယ်။

18 အယ်ကြောန့် ပထမ ပဋိညာဉ်တရား[†]ဟို့မှ စီရင်ဟူ ခီ
မာ သွီးန လွတ်ကင်းဘီး စီရင်ဟူဇာ မူဟု။

19 တရားတော်မပါဟူ ပညတ်လေဟို့ မောရှေဟာ လူ
လေရှိဟူမျှဟို့ ဟောပြောဘီးမှ ရေနရောဟူးဟူ နွားသား
ဂန်းသွီးန ဘဲသွီးဟို့ ယူဘီး နီရောန်ဆိုးဟူးဟူ သိုးမွီးန
ဟုသုပဗန်ခတ်အားဖြင့် ကျမ်းစာလိန လူလေဟို့ ဖျန်း
ဘီး၊

20 “အယ်သွီးဟာ နန်းနို့ဟို့ ဘုရားသခင် ဝန်ခံတော်မူဟူ
ပဋိညာဉ်ရဲ့ သွီးဖြစ်ဟယ်” ဆိုဘီး ပြောဆိုဟယ်။

21 အယ်ဘီးန တဲတော်န ဝတ်ပြုဟူ တန်ဆာလေ ရှိဟူ
မျှဟို့လည်း အယ်မျိုးဘဲ သွီးန ဖျန်းလေဟယ်။

22 ပညတ်တရားတိုင်းဘဲ ရှိမျှဂူလောင်းဟို့ ကူအောန်
သွီးအားဖြင့် စင်ကြယ်စေရဟယ်။ သွီးသွန်းလောင်းရှင်း
မွေဘဲနေဟာ ပြစ်လွတ်ရှင်း မွေဟု။

ခရစ်တော်ရဲ့ ပူဇော်ရှင်းအားဖြင့် ပြစ်လွတ်ဟူကြောင်း

23 အယ်ကြောန့် ကောင်းဂန်ဘောင်မာ ရှိဟူဇာလေ
ရဲ့ ပေါင်လေဟို့ အယ်မျိုး ယဇ်ပူဇော်ဟူ ဇာအားဖြင့်

[†] 9:18 ဇ.၁၈ ပဋိညာဉ်တရား၊ တူညီဟူ ဂရိစကားလောင်းရဲ့ ဓိပါယ်ဟု
“သေဒမ်းစ” န “ပဋိညာဉ်”။

စင်ကြယ်စေရဟူ ဖြစ်ကြောင့် ကောင်းဂန်မာရှိဟူ ဇာလေ
ဟို့ ပိုဘီး မြတ်ဟူ ယဇ်ပူဇော်ဟူ အအားဖြင့် စင်ကြယ်စေ
ရဟူ ဇာဖြစ်ဟယ်။

24 အယ်မျိုးတိုင်းဘဲ စစ်မှန်ဟူ သန့်ရှင်းဟူ ဌာန
လေရဲ့ ပေါင်ဖြစ်ဟူ၊ လူလတ်န လောက်ဟူ သန့်ရှင်း
ဆောင်း ဌာနထဲဟို့ ခရစ်တော်ဝမ်ဘဲန နို့လေတွပ်ကြောင့်
ခု ဘုရားသခင်ရဲ့ ရှေ့တော်မာ ကိုယ်ဟို့ ပြဟို့တွပ် ကော
န်းဂန်ကိုယ်ထဲဟို့ ဝမ်တော်မူဘိ။

25 ယဇ်ပုရောဟိတ်မန်းဟူ သန့်ရှင်းဆောင်း ဌာနထဲဟို့
လိဆန်လေရဲ့ သွီးန နှစ်စဉ်နှစ်တိုင်း ဝမ်ရဟူမျိုး ခရစ်
တော်ဟူ သူရဲ့ ကိုယ်ဟို့ ခါဘီးခါ ပူဇော်ရဟူဇာ မူဟူ။

26 အယ်မျိုးဘဲ ပူဇော်ရမယ် ဆိုဟူ ကမ္ဘာဦးဟုနေစ
ဘီး ခါပေါင်းမြော-က်များစွာ သေခံရလေ့မယ်။ ခုဆိုဟူ
အယ်ကပ်ကာလဆောင်းမာ တခါဒဲ ကိုယ်ဟို့ ပူဇော်ရှင်း
အားဖြင့် ပြစ်ရှိဟူမျှဟို့ ဖယ်ရှားဟို့တွပ် ပေါ်ထွပ်တော်မူ
လေဟယ်။

27 လူဟူ တခါဘဲ သေရဘီး အယ်ဘီးန တရားစီရင်ဇာ
ဟို့ ခံရဟူမျိုး၊

28 ခရစ်တော်ဟူ လူလေပြစ်ဟို့ ဖြေလွှတ်ဟို့တွပ် ကို
ယ်ဟို့ တခါဒဲပူဇော်ဘီးမှ နှော-က်တခါ အယ်သခင်ဟို့
မျှော်လင့်ဘီး နေဟူသူလေဟို့ ကယ်တန်ဟို့တွပ် ပြစ်နဆိုင်
ဘဲန ပေါ်ထွပ်တော်မူလေ့မယ်။

10

1 ပညတ်တရားဟာ နှော-က်ဖြစ်လာမယ့် ကောင်းကျိုး
လေရဲ့ ရိုလော့-က်ဘဲဖြစ်ဘီး အယ်မူဇာလေဟာ ပေါင်
သဏ္ဌာန် စစ်မှန်မှုဘဲဟူကြောန့် နှစ်စဉ်မပြတ် ပူဇော်ဟူ
ယဇ်အားဖြင့် ကိုယ်တော်နားဟို့ ချဉ်းကပ်ဟူ သူလေဟို့
စောင်လင်စေနိုင်ဟူ။

2 တကယ်ဟို့ စောင်လင်စေနိုင်ဟယ် ဆိုဟာ ဝတ်ပြု
ဟူ သူလေဟာ တခါဒဲန စင်ကြယ်ရှင်းဟို့ ရော့-က်ဘီးမှ
နှော-က်ထပ် ပြစ်ရှိနေသေးဟယ် ဆိုဘီး သံဝေဂတရား ရ
ဇာကြောန့် လောင်းဝမွှော့ဘဲကြောန့် အယ်ယဇ်လေဟို့ တ
ခါဒဲ ပူဇော်ဘီးဟာ နှော-က်ထပ် ပူဇော်ဘဲန နေမယ်မူဟ
လော။

3 ခုဆို ယဇ်ပူဇော်ရှင်းအားဖြင့် ပြစ်လေဟို့ဘဲ နှစ်စဉ်နှစ်
တိုင်း ပုလန်အော့-က်မေ့ ဒီရစေဟယ်။

4 ဖြားဖြစ်ကြောန့်နူးဆိုဟာ နွားသွီး၊ ဘဲသွီးဟာ ပြစ်လေ
ဟို့ ဖယ်ရှားပေးနိုင်ဘဲကြောန့် ဖြစ်ဟယ်။

5 အယ်ကြောန့် ခရစ်တော်ဟာ အယ်လောကဟို့ ဆင်း
ကြွလာဟူ ခီမာ၊

“ကိုယ်တော်ဟာ ယဇ်န ပူဇော်သကာဟို့ လိုတော်မွှော့ဘဲ
ကြောန့်

ကျွန်တော့်တွပ် ကိုယ်ခနုဇာဟို့ ပြင်ဆင်တော်မူဘီ။

6 ကိုယ်တော်ဟာ မီးရှို့ရာယဇ်န ပြစ်ဖြေရာယဇ် ရှိဟူမျှဟို့
နှစ်သက်တော်မူဟူ။

7 အယ်ဒီမာ ကျွန်တော်ဟု ကျမ်းစာလိမာ ကျွန်တော်
 ဟို့ ရည်ရွယ်ဘီး ရေးဟူးတိုင်း ‘အို၊ ဘုရားသခင်
 ကျွန်တော်ဟာ
 ကိုယ်တော်ရဲ့ လိုတော်ဟို့ ဆောက်ဟို့တွပ်
 ကျွန်တော် လာပါဟယ်’ ကျွန်တော်ဝန်ခံပါဟယ်” ဆို
 ဘီး လျှော့-က်ဆိုလေဟယ်။

8 ပထမနေန “ကိုယ်တော်ဟာ ပညတ်တရားအရ ပူဇော်
 ဟူ ရာလေဖြစ်ဟူ ယဇ်ကောန်န ပူဇော်သကာလေ၊ မီးရှို့
 ရာယဇ်န ပြစ်ဖြေရာ ယဇ်လေရှိဟူမျှဟို့ လိုတော်မေ့ဟု
 နှစ်သက်တော်မူရှင်းလည်း မေ့ဟု” ဆိုဘီး ဆိုဟယ်။

9 အယ်ဘီးန “အို၊ ဘုရားသခင် ကျွန်တော်ဟာ ကိုယ်တော်
 ရဲ့ လိုတော်ဆောက်ဟို့တွပ် လာပါဟယ်” ဆိုဘီး ပြော
 ရာမာ ဒုတိယ ယဇ်ပူဇော်ရှင်းဟို့ တည်စေဟို့တွပ် ပထမ
 ယဇ်ပူဇော်ရှင်းဟို့ ပယ်လေဟယ်။

10 အယ်လိုတော်တိုင်းဘဲ ယေရှုခရစ်ရဲ့ ကိုယ်ခနုဓာဟို့
 တခါဒဲပူဇော်ဟူ ဇာအားဖြင့် နို့လေဟာ စင်ကြယ်ရှင်းဟို့
 ရော့-က်ဂေလေဟယ်။

11 ယဇ်ပူရောဟိတ် ဆိုဇာဟု နေ့တိုင်းဝတ်ပြုဘီး ပြစ်
 လေဟို့ ဖြေနိုင်ဘဲဟူ ယဇ်ဟို့ ခါဘီးခါ ပူဇော်နေရဟယ်။

12 အယ်ဘေမဲ့ ခရစ်တော်ဟာ ပြစ်ဟို့ဖြေဟို့တွပ် ယဇ်
 တခုဒဲဟို့ ပူဇော်ဘီးဟာ ဘုရားသခင်ရဲ့ ညာဖတ်မာ မြဲဒ
 မ်းထိုင်ဘီး

13 သူ့ရဲ့ ရန်သူလေဟို့ သူ့ခေအော့-က်ဟို့ ခုလဟူးခန်

ခီထံ မျှော်လင့်ဘီး နေတော်မူဟယ်။

14 ဖြားဖြစ်ကြောင့်နူးဆိုဟာ ကိုယ်တော်ဟာ ကိုယ့်ကိုယ်
ကိုယ် တခါဒဲပူဇော်ဟူ ဇာအားဖြင့် သန့်ရှင်းရှင်းခံရဟူ သူ
လေဟို့ ထာဝရစောင်လင် စေတော်မူဟယ်။

15 သန့်ရှင်းဟူဝိညာဉ်တော်ဟာ နို့လေဟို့ သတ်သေခံဟူ
ဇာဟု၊

16 “နော-က်ကာလမာ သူးနို့လေဟို့ ငါပေးဟူ ပဋိညာဉ်တ
ရားဟု

ငါဘုရားသခင်ဟာ ငါ့ပညတ်လေဟို့
သူးနို့လေရဲ့ စိန်လောင်းထဲဟို့ သွမ်းပေးမယ်။

သူးနို့လေရဲ့ စိဝိညာဉ်ထတ်မာ ရေးဟားမယ်” ဆိုဘီး
မိန့်တော်မူဘီးန

17 နော-က်ထပ် “သူးနို့လေရဲ့ ပြစ်မှားရှင်းန လွန်ကျူးရှင်း
ဘောင်းဇောင်ဟို့ အော့-က်မေ့ဘဲန နေမယ်” ဆိုဘီး မိန့်
တော်မူလေဟယ်။

18 အယ်ပြစ်လေဟို့ လွတ်ဘီးဟာ နော-က်တခါ ပြစ်ဖြေ
ဟူ ပူဇော်သကာလေဟို့ ဆစ်သဟို့ လိုဟုမ်း။

ဘုရားသခင်နားဟို့ ချဉ်းကပ်ဂေဟို့ကြောန်း

19 အယ်ကြောန့် ညီကို မောန်နှမလေ ယေရှုရဲ့ သေခံ
တော်မူရှင်းအားဖြင့် နို့လေဟာ သန့်ရှင်းဆောင်း ဌာနတော်
ထဲဟို့ သွီးတော်ဟို့ မှီပြုဘီး ဆီးတားမေ့ဘဲ ဝမ်းခွံရဂေဟု
ယ်။

20 အယ် သွီးတော် အားဖြင့် ကိုယ်တော်ဟာ သူရဲ့
ကိုယ်ခန္ဓာဖြစ်ဟူ လိုက်ကာဟုနေဘီး ဘုရားသခင်ရဲ့ ရှေ့

တော်ဟို့ ရော့-က်ဟူ သတ်လမ်းသစ်ဟို့ ဖွင့်ပေးတော်မူ
ဘိ။

21 အယ်လော့-က်နမကဟု နို့လေမာ ဘုရားသခင်ရဲ့
အိတော်ဟို့ အောက်စိုးဟူ ယဇ်ပုရောဟိတ်မန်း ရှိဟူဖြစ်
ကြောန့်။

22 နို့လေရဲ့ စိန်လောင်းဟို့ ဆိုးညစ်ဟူ စိသဘောန ကင်း
စေဟို့တွပ် ပတ်ဖျမ်းရှင်းဟို့ ခံယူဘီး ကိုယ်ခနုဇာဟို့လည်း
စင်ကြယ်ဟူ ရေအားဖြင့် ဆေးကြောဘီး ယောင်ကြည်
ရှင်းနဆိုင်ဟူ စိခလမှု ပုလဲပုလဲဝဝန မှန်ကန်ဟူ စိန်လောင်း
အားဖြင့် ဘုရားသခင်နားဟို့ တိုးဝမ်ဂေဇို။

23 ဖြားဖြစ်ကြောန့်နူးဆိုဟာ ဂဒိထားတော်မူဟူ သူဟာ
သစ်စာန ပုလဲဇောင်တော်မူဟူကြောန့် ဖော့-က်ပုလန်ဘီး
ယီးယိုင်သွားဘဲ နို့လေဝန်ခံဟူ မျော်လင့်ရှင်းဟို့ စွဲစွဲမြဲမြဲ
ဆုပ်ကိုင်ဟူးဂေဇို။

24 နို့လေဟာ မြစ်တာထားဟို့န ကောန်းဟူကျင့်ဟို့ ကျင့်
စေဟို့တွပ် ယော့-က်ဟို့ယော့-က် ဖြားမျိုး တိုက်တွန်း
နှိုးဆော်ရမယ် ဆိုဇာဟို့ ဆင်ခြင်ဂေဇို။

25 လူတချို့ ထောင်းဇံရှိဟူတိုင်း ရှင်းရှင်းစည်းဝေး
ရှင်းဟို့ ရှောန်လွဲဘဲနေဟို့တွပ် ရှင်းရှင်း အားပေးဘီး
တိုက်တွန်း နှိုးဆော်ဂေဇို။ ခီကာလ နီးလာဇာဟို့ ထော့-က်
ဘီး ပိုဘီး ကြိုးစားဂေဇို။

26 ဖြားဖြစ်ကြောန့်နူးဆိုဟာ သမ္မာတရားဟို့ သိဘီးမှ
ကိုယ့်လိုဟို့ လိုက်ဘီး ပုလန်ပြစ်မှားမယ် ဆိုဟာ နော့-က်

ထပ် ပြစ်ဖြေဟို့ယဇ်ဟို့ ပူဇော်ခွမ်းမော့ဘဲ၊

27 ရရာတိုင်း ပြင်းထန်ဟူ ဒန်စီရင်ရှင်းဟို့ ခံရမယ် ဆိုဘီး ကြော့-က်ဇာကောန်းဟူဇာဟို့ မျှော်လင့်ရဟူကြောန်း ရှိဟူကြောန်း ငြင်းဆန်ဟူ သူလေဟို့ ဖျစ်ဆီးဟို့တွပ်ဘုရားသခင်ရဲ့ မျစ်တော်မီးလောန်ဇာဟို့ ခံရဟို့ကြောန်းရှိဟယ်။

28 မောရှေရဲ့ ပညတ်တရားဟို့ ပယ်ဟူသူဟာ သတ်သေခံ နှော့ယော့-က်၊ သောင်းယော့-က် ရှိဟယ် ဆိုဟာ သနားညှာတာရှင်းဟို့ ခံရဘဲန သေခံရဟယ်။

29 အယ်လော့-က်နမကဟာ ဘုရားသခင်ရဲ့ သားတော်ဟို့ ခေနန်းဘီး ကိုယ့်ဟို့ စင်ကြယ်စေဟူ ပဋိညာဉ်တရားရဲ့ သွီးတော်ဟို့ စင်ကြယ်ဘဲဟူဇာ ဆိုဘီး ထန်မှတ်ဘီးဟာ ဆုကျေးဇူးဟို့ ပေးဟူ ဝိညာဉ်တော်ဟို့ ထိမဲ့မြင်ပြုဟူ သူဟာ ဖယ်မျှလော့-က်ကီးဟူ ဒန်ဟို့ ခံရမယ်ဆိုဇာ နန်းနို့လေ ဖယ်မျိုးထန်ဂေ့နူး။

30 ဖြားဖြစ်ကြောန်းနူးဆိုဟာ “ငါဟာ ပြစ်တရားဟို့ စီရင်ပိုင်ဟယ်။ ပြစ်ရှိဟူတိုင်း ငါဆပ်ပေးမယ်” ဆိုဟူဇာန “ဘုရားသခင်ဟာ သူ့ရဲ့ လူစုတော်လေတွပ် တရားစီရင်မယ်” ဆိုဘီး မိန့်တော်မူဟူ သခင်ဟို့ နို့လေသိဂေ့ဟယ်။

31 သတ်ရှင်တော်မူဟူ ဘုရားသခင်ရဲ့ လတ်တော်ဟို့ ကုလရော့-က်ဟူ မူဟာ ကြော့-က်ဇာကောန်းဟူ မူဖြစ်ဟယ်။

32 နန်းနို့လေဟာ ဘုရားသခင်ရဲ့ လန်းရောန်ဟို့ ခံယူဘီးန ဆင်းရဲဒေါက်ခဟို့ ခံစားရဘီး ပြင်းထန်ဟူ တိုက်ခိုက်ရှ

င်းဟို့ သီးခံဘီးဟူ ရင်းရင်ဒူးဟု နေရစ်လေဟို့ ဒီရဂေပါ။

³³ နန်းနို့လေဟာ တခါတလေ လူလေရှေ့မာ ကဲ့ရဲ့ ညှဉ်းဆဲဇာဟို့ ခံရဂေဟယ်။ တခါတလေလည်း တခြား သူလေ ကဲ့ရဲ့ ညှဉ်းဆဲဇာဟို့ ခံရဟူ ခီမာ နန်းနို့လည်း ထပ်တူထပ်မျှခံဟို့တွပ် ဆင်သင့်ရှိဂေဟယ်။

³⁴ နန်းနို့လေဟာ ထောန်ကုလနေဟူ သူလေတွပ်ကြောန် စာနာစိရှိဟူမျှမူဘဲ ကိုယ့်ပစ်စီး အောက်စာလေဟို့ သူများ ဖျစ်ဆီးဟူလည်းဘဲ ကိုယ်သောင်းစွဲဟို့တွပ် ကောန်းဂန် ဘောင်မာ ပိုဘီး မြတ်ဘီး စဉ်မြဲတည်ဟူ ဘဏ္ဍာရှိဟယ် ဆိုဇာဟို့ သိဟူကြောန် လုယူဖျစ်ဆီးခံရဇာဟို့ ဝန်းသာဟူ စိန် သီးခံဂေဟယ်။

³⁵ အယ်ကြောန် ရရာတိုင်း ကီးမားဟူ ကျိုးနယှဉ်ဟူ နန်း နို့ရဲ့ ရဲရင့်မှုစိဟို့ စွန့်လွှတ်ဂေန။

³⁶ ဘုရားသခင်ရဲ့ လိုတော်ဟို့ ဆောန်ဘီးမှ ဂဒိတော် တိုင်း ကျိုးဟို့ ရဟို့တွပ် သီးခံရှင်းစိရှိရမယ်။

³⁷ ဖြားဖြစ်ကြောန်နူးဆိုဟာ၊

“ကြွလာမယ့် သူဟာ

ခီဆိုင်းဘဲ

ကြာခန်မာ ရော့-က်လာလေ့မယ်။

³⁸ ဖြောန်မတ်ဟူ သူဟာ ယောင်ကြည်ရှင်းအားဖြင့် သတ် ရှင်လေ့မယ်။

အယ်ဘေမဲ့ ရွေ့လျော့ဖော့-က်ပုလန်ဟာ ငါ့စိဝိညာဉ် ဟာ

အယ်သူဟို နှစ်သက်မှု မေ့ဟု” ဆိုဘီး ဘုရားသခင်
မိန့်တော်ရှိဟယ်။

³⁹ နို့လေဟာ ပျစ်စီးရှင်းဟို ရော့-က်ဟိုတွပ် ရွေ့လျော့
ဟော့-က်ပုလန်ဟူ သူလေ မှဟု။ စိဝိညာဉ်ဟာ ကယ်တန်ရှ
င်းဟို ရော့-က်ဟိုတွပ် ယောင်ကြည်ဟူ သူလေ ဖြစ်ဂေဟ
ယ်။

11

ယောင်ကြည်ရှင်းကြောန်း

¹ ယောင်ကြည်ရှင်း ဆိုဇာဟာ ကိုယ်မျှော်လင့်ဟူ ဇာလေ
ဟို မျစ်မော့-က်ပြုဟူဇာ ဖြစ်ဟယ်။ ဗြင်ရသေးဘဲဇာလေ
ဟို သိမှတ်စွဲလန်းရှင်းကြောန်း ဖြစ်ဟယ်။

² အယ်မှု ယောင်ကြည်ရှင်း ပါရမီကြောန် ရှေးလူဂီးလေ
ဟာ ဘုရားသခင်ရဲ့ ထော့-က်ခံချီးကျူးဟူဇာဟို ခံရဂေ
ဟယ်။

³ ခုဗြင်ရဟူ ဇာလေဟာ ရင်းရင်ဒူးဟု ထန်ရှားဟူ ဇာ
လေထဲဟု ဖြစ်ဟူဇာမူဘဲ စကြဝဠာဟာ ဘုရားသခင်ရဲ့
စကားတော်အားဖြင့် ဖြစ်လာဟူဇာဟို နို့လေဟာ ယောင်
ကြည်မှုအားဖြင့် သိဂေဟယ်။

⁴ အာဗေလဟာ ကာကူန ပူဇော်ဟူ ယင်ထတ် ပိုဘီး
မြတ်ဟူ ယင်ဟို ယောင်ကြည်ရှင်းအားဖြင့် ဘုရားသခင်
ဟို ပူဇော်ဟယ်။ အယ်မျိုးယင်ဟို ပူဇော်ဟူကြောန် သူဟာ
ဖြောန်မတ်ဟယ် ဆိုဘီး သတ်သေခံဟူဇာဟို ရလေဟယ်။

ဖြားဖြစ်ကြောန့်နူးဆိုဟာ ဘုရားသခင်ဟာ သူ့ရဲ့ ပူဇော်သကာဟို့ သိမှတ်ပြုတော်မူဟယ်။ အယ်ကြောန့် အာဗေလဟာ သေဟူးဘီ ဖြစ်ဟူလည်းဘဲ အယ်မူ ယောင်ကြည်ရှင်းအားဖြင့် ခု တရားဟောနေသေးဟယ်။

⁵ နောက်ဟာ ယောင်ကြည်ရှင်းအားဖြင့် သေရှင်းန လွတ်ဟူးဘီး ဘဝကူးပုလောင်းခွမ် ရဟယ်။ ဘုရားသခင်ဟာ သူ့ဟို့ ဘဝပုလောင်းစေဟူကြောန့် နေ့-က်ထပ်ခါ သူ့ဟို့ တို့ရဟမ်း။ သူဟာ ဘဝပုလောင်းခန် ဘုရားသခင်ရဲ့ စိတ်တော်န တို့ဟူသူ ဖြစ်ဟယ် ဆိုဘီး သတ်သေခံဟူ ဇာဟို့ ရလေဟယ်။

⁶ ယောင်ကြည်ရှင်းမေဟု ဆိုဟာ ဘုရားသခင်ရဲ့ စိတ်တော်န တို့နိုင်ဟု။ ဖြားဖြစ်ကြောန့်နူးဆိုဟာ ဘုရားသခင်နားဟို့ ချဉ်းကပ်ဟူ သူဟာ ဘုရားသခင် ရှိဟယ် ဆိုဇာဟို့ရော၊ ကိုယ်တော်ဟို့ ရှာဟူသူဟို့ ကျိုးပေးတော်မူဟယ် ဆိုဇာဟို့ရော ယောင်ကြည်ရမယ်။

⁷ နောဇဟာ မြင်ရသေးဘဲဟူ မူရာလေဟို့ ဖော်ပြဟူ ဗျာဒိတ်တော်ဟို့ ခံရဘီးမှ ယောင်ကြည်ရှင်းအားဖြင့် ကြော့-က်ရှို့ဟူ စိရှိဟူကြောန့် သူ့ရဲ့ အီသူအီသားလေဟို့ ကယ်တန်ဟို့တွပ် သန်းဖောဟို့ ဆော့-က်လေဟယ်။ အယ်မူ ယောင်ကြည်ရှင်းအားဖြင့် လောကသားလေရဲ့ ပြစ်ဟို့ စီရင်ဘီးဟာ ယောင်ကြည်ရှင်းန ယှဉ်ဟူ ဖြောန့်မတ်ရှင်းဟို့ မွီခံရလေဟယ်။

⁸ အာဗြဟံဟာ သူ့မွီခံရမယ့် ပြည်ဟို့ ထွပ်ဟူးဟို့တွပ်

ဘုရားသခင် ခေါ်တော်မူဟူ ခီမာ သူသွားဟူ ရပ်ဒေသဟို
သူကိုယ်တိုင် သိဘဲန ယောင်ကြည်ရှင်းအားဖြင့် နာခံဘီး
ထွပ်ဟူးလေဟယ်။

⁹ သူဟာ ယောင်ကြည်ရှင်းအားဖြင့် ဂဒိထားတော်မူဟူ
ပြည်မာ ဧည့်သယ်ဖြစ်န နေလေဟယ်။ သူ့မျိုးဘွဲ့ ဂဒိတော်
ဟို မွီခံရဟူ သူလေဖြစ်ဟူ ကုဇာက်၊ ယာကုပ်ဟူမျိုး တဲ
လေန နေလေဟယ်။

¹⁰ ဖြားဖြစ်ကြောန့်နဲ့ဆိုဟာ သူဟာ ဘုရားသခင် တည်
ထောန် ပြုစုတော်မူဟူ၊ ခိုင်ခံ့တည်မြဲဟူ မြို့ဟို မျှော်လင့်
ဟူကြောန့် ဖြစ်ဟယ်။

¹¹ သူ့ရဲ့မယား စာရာဟုလည်း ရွယ်လွန်ဘီး သားရနိုင်
ဘဲဟူ ခီမာ ဗိုက်ရနိုင်ဟူ ခွမ်တဂိုးဟို ယောင်ကြည်ရှင်း
အားဖြင့် ခံရလေဟယ်။ သူ *ဟာ ဂဒိပေးဟူ သူဟို သစ်
စာရှိဟယ် ဆိုဘီး မှတ်ယူဟူကြောန့် ဖြစ်ဟယ်။

¹² အယ်မူ မှာရာအားဖြင့် လူသေနတူဟူ သူတယော့-က်
ဟာ ရေတွပ်အားဖြင့် ကောန်းဂန်ဟု ကြယ်ဟူမျိုး၊ ပန်
လယ်ကမ်းနားဟု ရေတွပ်နိုင်ဘဲဟူ သဲလောင်းလေမျိုး လူ
လေ ဂူလောင်းရဲ့ ဖတယော့-က် ဖြစ်လေဟယ်။

¹³ ခုပြောဟူ လူလေဟာ ဂဒိတော်န စပ်ဆိုင်ဟူ ကျိုး
ကျေးဇူးလေဟို ခံစားရဘဲ ဝီးဟုနေဘွဲ့မြင်ဘီး စိန်လောင်း

* **11:11 သ.သ** သူ့ရဲ့မယား စာရာဟုလည်း ရွယ်လွန်ဘီး သားရနိုင်ဘဲဟူ
ခီမာ ဗိုက်ရနိုင်ဟူ ခွမ်တဂိုးဟို ယောင်ကြည်ရှင်းအားဖြင့် ခံရလေဟယ်။
သူ၊ တချို့ မူရင်းလတ်ရေးမူလေမာ စာရာဟု သားရဟူတွပ် ရရာတိုင်း
သတ်ကီးနေဟူ လည်းဘွဲ့ သူကိုယ်တိုင်ဟု ဗိုက်ပိုက်နိုင်ဟယ် ဆိုဘီး
ယောင်ကြည်လေဟယ်။ သူ၊ ဆိုဘီး ပါရှိဟယ်။

န ဖတ်ယမ်းဘီးဟာ သူးနို့လေဟာ မုလေဂီးမာ ဧည့်သယ်
ဖြစ်ဟယ် ဆိုဇာဟို့ ထန်းထန်ရှားရှား ဝန်ခံဘီး ယောင်
ကြည်ရှင်းစိန် သေလွန်ဟားဂေလေဟယ်။

14 အယ်မျိုး ဝန်ခံဟူ သူလေဟာ သူးနို့လေရဲ့ နေရင်း
ပြည်ဟို့ ကြိုးစားရှာဂေဟယ် ဆိုဘီး ပြတ်ပြတ်သားသား
ပြောဆိုဂေဟယ်။

15 အယ်သူလေဟာ သူးနို့ထွပ်လာဟူ ပြည်ဟို့ တကယ်
အော့-က်မေ့မယ် ဆိုဟာ ပုလန်နိုင်ဟူ ခွမ်လမ်း ရှိဂေဟ
ယ်။

16 အယ်ဘေမဲ့ အယ်ပြည်ဟို့ အော့-က်မေ့ဘဲ အယ်ပြည်
ထတ် သာလွန်ဟူ ကောင်းဂန်ရွှေပြည်ဟို့ တောင်းတဂေ
လေဟယ်။ အယ်ကြောန့် ဘုရားသခင်ဟာ သူးနို့ရဲ့ ဘုရား
ဆိုဘီး ခေါ်ဟူဇာဟို့ ယှစ်တော်မူဟု။ သူးနို့နေဟို့ မြို့ဟို့
လည်း တည်ထောက်တော်မူဘိ။

17 အာဗြဟံဟာ စောင်ဇမ်းရှင်းဟို့ ခံရဟူ ခီမာ ယောင်
ကြည်ရှင်းအားဖြင့် သားကုဇာက်ဟို့ ပူဇော်လေဟယ်။ ဂ
ဒိတော်လေဟို့ ရဟူသူဟာ တယော့-က်ဒဲရှိဟူ သားဟို့ ပူ
ဇော်ဟို့တွပ် ပြင်ဆင်လေဟယ်။

18 အယ်သားန ပတ်သတ်ဘီး “ကုဇာက်အားဖြင့်ဘဲ နန်
မျိုးနွယ် တည်ရမယ်” ဆိုဟူ ဂဒိတော်လေဟို့ ခံရဟူသူ
ဟာ သူမာ တယော့-က်ဒဲရှိဟူ သားဟို့ ပူဇော်လေဟယ်။

19 အယ်မျိုး ပူဇော်ဟူ ခီမာ သေရှင်းဟုနေ ပုလန်ရှင်
ဘီး ထမြော့-က်ဟို့တွပ် ဘုရားသခင် တတ်နိုင်ဟယ် ဆိုဇာ

ဟို သူအော့-က်မေ့လေဟယ်။ အယ်သားဟို ဆိုရိုးစကား အားဖြင့် သေဒွမ်းထဲဟု ပုလန်ရလေဟယ်။

20 ကူဇာ က် ဟာ လည်း ယောင်ကြည် ရှင်း အားဖြင့် နော့-က်ဖြစ်လာမယ့် ရာလေဟို ရည်ဇူးဘီး ယာကုပ်န ဧ သောဟို ကောင်းဂျီးပေးလေဟယ်။

21 ယာကုပ်လည်း သေခါနီးလာဟူ ခီမာ ယောင်ကြည် ရှင်းအားဖြင့် ယောသပ်သား နှေ့ယော့-က်ဟို ကောင်းဂျီး ပေးဘီး သူတောန်အူးထိဟို မှီဘီးဟာ ဘုရားသခင်ဟို ကိုးကွယ်လေဟယ်။

22 ယောသပ်ဟာ သေခါနီးဟူ ခီမာ ယောင်ကြည်ရှင်း အားဖြင့် ကူသရေလ လူမျိုးလေ အဲဂုတုတုပြည်ဟု ထွပ် မြော့-က်ဟို ကြောန်းရာဟို ပြောဘီး သူသေခါနီးမာ သူရိုး န ပတ်သတ်ဘီး မှာဟူးလေဟယ်။

23 မောရှေဟို မိုးဖွားဘီးန ရှစ်ဇာကောင်းဟူ သား ဂန်းဟူးဖြစ်ဇာဟို သူမိဖမြင်ဟူ ခီမာ ယောင်ကြည် ရှင်းအားဖြင့် မန်းဂီးရဲ့ မိန်ဟို ကြော့-က်ဘဲ သောင်းလ လောင်းလောင်း သူဟို ဝှပ်ဟူးလေဟယ်။

24 မောရှေဟာ သတ်ရွယ်ကီးလာဟူ ခီမာ ယောင်ကြည် ရှင်းအားဖြင့် ကိုယ့်ကိုယ်ကိုယ် ဖာရောမန်းဂီး သမီးတော် ရဲ့ သားဆိုဘီး ခေါ်ဟူခွမ်ဟို ငြင်းပယ်ဘီးဟာ၊

25 ပြစ်ရှိဟူ ကာမဂေါင်ဟို ရှစ်ဟူးခံစားရဟူ ဇာထတ် ဘုရားသခင်ရဲ့ လူမျိုးတော်လေနတူးဒူ ဆင်းရဲဒေါက်ခခံ

ရဟူ ဇာဟို ယောင်ကြည်ရှင်းအားဖြင့် ဝီးကော-က်လေဟယ်။

26 သူဟာ နော-က်ရလာမယ့် ကျိုးဟို မျှော်လင့်ဟူ ကြောန့် ခရစ်တော်တွပ် ခံရဟူ ကဲ့ရဲ့ပြစ်တန်ရှင်းဟို အဲဂုတုတုပြည်ရဲ့ စည်းဇိမ်ထတ် ပိုဘီး မြတ်ဟူ စည်းဇိမ်ဖြစ်ဟယ် ဆိုဘီး ယောင်ကြည်ရှင်းအားဖြင့် မှတ်ယူလေဟယ်။

27 ယောင်ကြည်ရှင်းအားဖြင့် မန်းဂီးရဲ့ မျစ်တော်ဟို ကြော-က်ဘဲန အဲဂုတုတုပြည်ဟို စွန့်ဘီးသွားလေဟယ်။ ဖြားဖြစ်ကြောန့်နူးဆိုဟာ သူဟာ မျစ်စိန် မြင်ရဘဲဟူ ဘုရားသခင်ဟို မြင်ရဟူမျိုး တည်ကြည်မှု ရှိလေဟယ်။

28 သားဦးလေဟို ဖျစ်ဆီးဟူသူဟာ ကုသရေလ လူမျိုးလေရဲ့ သားဦးလေဟို ဒန်ခတ်ဘဲနေဟိုတွပ် ယောင်ကြည်ရှင်းအားဖြင့် ပသခါပွဲဟို စီမံဘီးဟာ ခွဗော-က်တိုင်လေဟို သွီးန ဖျန်းလေဟယ်။

29 ကုသရေလ လူမျိုးလေဟာ ကူးကြောန်းသွားရဟူမျိုး ယောင်ကြည်ရှင်းအားဖြင့် ဧဒုပန်လယ်ရဲ့ လယ်မာ ခေဂျင်ရှော-က်သွားရလေဟယ်။ သူးနို့လေမျိုး အဲဂုတုတုလူမျိုးလေ နော-က်ဟု လိုက်ဟူ ခီမာ ရေမှလုပ်ဘီး သေဂေလေဟယ်။

30 ယေ ရို ခေါ မြို့ ဟို ခွန် နစ် ရစ် လောင်း လောင်း လှည့်ပတ်ဘီးမှ ယောင်ကြည်ရှင်းအားဖြင့် မြို့ရိုးပြိုလဲလေဟယ်။

31 ကောန်းဘဲဟူ မီးမ ရာခပ်ဟာ ယောင်ကြည်ရှင်းအားဖြင့် ကုသရေလ သူလျှိုလေဟို မိဆွေဖွဲ့ဘီး ငြီးချမ်းမှုအားဖြင့် လတ်ခံဟူကြောန့် ယောင်ကြည်ဘဲဟူ သူလေနတူးဒု ပျစ်စီးရှင်းခံရဟူ။

32 နှော-က်ထပ် ဖယ်မျိုး ကြောန်းရာလေဟို ပြောပြရအူးမယ်နူး။ ဂိဒေါင်၊ ဗာရက်၊ ရှိဆုံ၊ ယေဖေသ၊ ဒါဝိဒ၊ ရှမေလဟုနေစဘီး ပရောဖက်လေကြောန်းဟို ပြောပြဟို ကဟူ။

33 အယ်သူလေဟာ ယောင်ကြည်ရှင်းအားဖြင့် တခြားတိုင်းနိုင်ငံလေဟို အောက်ဟယ်။ ပြောန့်မတ်ရှင်းအားဖြင့် အောက်ချောက်ဟယ်။ ဘုရားသခင်ရဲ့ ဂဒိတော်ဟို ဝမ်စားဟယ်။ ခြင်္သေ့နှောက်ဟို ပိဟယ်။

34 တော့-က်လောန်နေဟူ မီးရှိဟို ငြီးစေဟယ်။ ထားလတ်နပ်ဘေးဟု လွတ်ဟယ်။ နာဟုနေ လွတ်မြော့-က်ဘီး ကျမ်းမာရဟယ်။ စစ်တိုက်ဟူ ခီမာ စွမ်းရည်ခွန်အားနု ပုလဲဝရဟယ်။ တခြားလူမျိုးလေရဲ့ တပ်လေဟို တိုက်ယူပျစ်ဆီးရှင်း မူရာလေဟို ပြုဂေလေဟယ်။

35 မီးမလေလည်း ယောင်ကြည်ရှင်းအားဖြင့် သေဟားဘီးဟူ သူးနို့သားလေ သတ်ပုလန်ရှင်လာဇာဟို ပုလန်ရဂေဟယ်။

တချို့လူလေဟာ ပိုဘီး မြတ်ဟူ ထမြော့-က်ရှင်းဟို ရော့-က်ရှင်ကြောန့် လွတ်မြော့-က်ဟူ ဇာဟို ခံယူဘဲ ရစ်ရစ်ဆစ်ဆစ် ညှဉ်းဆဲဇာဟို ခံဂေလေဟယ်။

³⁶ တချို့လူလေဟာ ကဲ့ရဲ့ခံရဘီး၊ ရိုက်ခံရဘီး၊ တချို့လူလေဟာ ထောန်ထဲမှာ သံကြိုးနဲ့ ခယ်ဟူးဇာဟို့ ခံရလေဟယ်။

³⁷ သူးနို့ လေဟာ ကုလော့-က်ခဲန ပစ်ခံရရှင်းလေ၊ လွန်ပိုင်းပိုင်း တိုက်ဖြတ်ခံရရှင်းလေ၊ စောင်ဇမ်း နှော့-က်ယှစ်ခံရရှင်းလေ၊ ထားနဲ့ သတ်ခံရရှင်းလေ၊ ဆင်းရဲရှင်းလေ၊ ညှဉ်းဆဲနိစစ်ခံရဘီး သိုးသရေလေ၊ ဘဲသရေလေဟို့ ဝတ်ဘီး လှည့်လည် သွားလာရဂေဟယ်။

³⁸ အယ်လောကဟာ အယ်သူလေန ထိုက်တန်ဟု။ သူးနို့လေဟာ တောကန္တာရလေ၊ တောန်တန်းလေ၊ လှိုင်ဂူလေန မှလေတွမ်းလေမှာ လှည့်လည်ဘီး နေရလေဟယ်။

³⁹ အယ်လူလေ ဂူလောင်းဟာ ယောင်ကြည်ရှင်းအားဖြင့် ထော့-က်ခံ ချီးကျူးဟူဇာဟို့ ခံရဟူလည်းဘဲ ဂဒိတော်တိုင်း ကျိုးကျေးဇူးလေဟို့ ခံရဂေဟု။

⁴⁰ ဖြားဖြစ်ကြောနဲ့ဆိုဟာ အယ်လူလေဟာ နို့လေပါဘဲ စောင်လင်ရှင်းဟို့ ရော့-က်ဘဲနေဟို့တွပ် ဘုရားသခင်ဟာ နို့လေတွပ်ကြောနဲ့ ပိုဘီး မြတ်ဟူ ကျေးဇူးဟို့ ကြံစည်တော်မူလေဟယ်။

12

နို့လေရဲ့ ဖဘုရားသခင်

¹ အယ်ကြောနဲ့ အယ်မျှလော့-က်များဟူ သတ်သေလေဟာ နို့လေဟို့ ဝိုင်းရံဟူးဟူ ဖြစ်ကြောနဲ့ နို့လေဟာ ဝန်လေဂူလောင်းနဲ့ နှော့-က်ယှစ်တတ်ဟူ ပြစ်လေဟို့ ဖယ်ရှားဘီး

နို့မျစ်မော့-က်ရှေ့မာ ထားဟူးဟူ ပန်းတိုင်ဟို့ ရော့-က်ဟို့ တွပ် အားလျှော့ဘဲန ပုလေးဂေဇို။

² ယောင်ကြည်ရှင်းဟို့ စပြုတည်စေဘီး စောင်လင်စေ တော်မူဟူ သခင်ယေရှုဟို့ စေ့စေ့ထော့-က်ရှုဂေဇို။ အယ် သခင်ဟာ သူရှေ့မာထားဟူ ဝန်းသာရှင်း ကြောန်းကြောန် ယှစ်ကြော့-က်ဟူ အလေဟို့ မှတ်ဘဲန လတ်ဝါးကပ်တိုင် မာ ခံဘီးမှ ဘုရားသခင်ရဲ့ ပလ္လင်တော် ညာဖတ်မာ ထိုင် နေတော်မူဟယ်။

³ ပြစ်ရှိဟူ သူလေ လတ်ထဲမာ အယ်မျှလော့-က်ကီး ဟူ ဆီးတား နှော့-က်ယှစ်ရှင်းဟို့ ခံတော်မူဟူ သခင်ဟို့ ထော့-က်ရှု ဆင်ခြင်ရှင်းအားဖြင့် အားလျှော့ စိပျစ်မှုလေ န လွတ်ကင်းဟို့တွပ် ကြိုးစားဂေပါ။

⁴ နန်းနို့လေဟာ ဒုစရိုက်ပြစ်ဟို့ တွန်းလှန်ဟူကြောန် သွီး ထွပ်အောက်ထိ ခံရဖူးသေးဟု။

⁵ ကျမ်းစာတော်မာ ဘုရားသခင်ဟု၊

“ငါ့သား၊ ဘုရားသခင် ဆောင်းမ ပဲ့ပြင်တော်မူဟူ အဟို့ လေးထားဘဲနေန။

ဆောင်းမခံရဟူ ခီမာ စိပျစ်န။

⁶ ဖြားဖြစ်ကြောန်နှူးဆိုဟာ ဘုရားသခင်ဟာ ရှစ်တော်မူဟူ သားဟို့ ဆောင်းမတတ်ဟယ်။

သားဖြစ် လတ်ခံဟူ သူရှိဟူမျှဟို့ ရိုက်ဘီး ဒန်ခတ် တော်မူတတ်ဟယ်” ဆိုဘီး သားဂန်းဟူးလေ ဟို့ ပြောဟူမျိုး နန်းနို့လေဟို့ ပြောဟူ တိုက်တွန်း

အားပေးစကားကို နန်းနို့မေ့ဟွားဂေ့ ဘီလော။

7 ဘုရားသခင်ဟာ နန်းနို့ကို သားဟူမျိုး ပြုမူတော်မူဟူ ကြောင့် နန်းနို့လေဟာ ဆောင်းမတော်မူဟူ ဇာတိ သီးခံဂေ့ ရမယ်။ ဖြားဖြစ်ကြောင့်နူးဆိုဟာ ဖဆောင်းမဘဲဟူသား တဇောင်တယာ-က် ရှိဟူကြောင့်လော။

8 လူတိုင်းခံရတတ်ဟူ ဆောင်းမရှင်းကို နန်းနို့ခံရဘဲနေဟာ သားရင်းမူဘဲ တရားဝမ်ဘဲဟူ သားလောဘဲ ဖြစ်ဂေ့ဟယ်။

9 နှော-က်ဘီး နို့လေဟာ ကိုယ်ကာယနုဆိုင်ဟူ ဖခင်လေ လတ်နု ဆောင်းမဟူဇာတိ ခံရဟူ ခီမာ သူးနို့လေကို ရှိသေလေးစားဂေ့ဟယ်။ အယ်လော့-က်နုမကဟု ဝိညာဉ် ရေးရာနု ဆိုင်ဟူ ဖခင်လေကို ပိုဘီး နာခံမယ် ဆိုဟာ နို့ လေဟာ သတ်ချမ်းသာရာ ရဂေ့မယ် မူဟုလော။

10 ဖြားဖြစ်ကြောင့်နူးဆိုဟာ ဇာတိဖခင်လေဟာ သူးနို့ ကောင်းမယ်ဆိုဘီး ထန်ဟူတိုင်း ရှစ်ဟွားဘဲ ဆောင်းမပေး တတ်ဟယ်။ အယ်ဘေမဲ့ ဘုရားသခင်ဟာ သူ့ရဲ့ သန်ရှင်း ရှင်း ပါရမီတော်ကို နို့လေခံစားရဟူတွပ် နို့လေရဲ့ ကျိုးကို ထော့-က်ဘီး ဆောင်းမပေးတော်မူဟယ်။

11 ဆောင်းမခံရဟူ ဇာလေဟာ ခံရဟူ ခီမာ ဝန်းသာရမယ့် ကြောင့်ရာ ဖြစ်ဟယ် ဆိုဘီး ထန်ဘဲနု ဝန်းနဲဇာ ဖြစ်ဟယ် ဆိုဘီး ထန်တတ်လေဟယ်။ အယ်ဘေမဲ့လည်း ဆောင်း မခံရဟူ သူလေဟာ နှော-က်မှ ငြိသတ်ရှင်းနု စပ်ဆိုင်ဟူ ဖြောင့်မတ်ရှင်း ကျိုးကို ခံစားရဂေ့လေဟယ်။

ညွှန်ကြားဟူဇာနု ဒီပေးချစ်လေကြောင့်

12 အယ်ကြောန့် အားကူနေဟူ လတ်လေန အားမဲ့ဘဲ ဟူ ဒူးလေဟို့ ခိုင်ခံ့စေပါ။

13 ခေသန်ဘဲဟူ သူလေဟာ ဆစ်လေပုလုထွပ်ဘဲန ကောန်းတိုင်း ပုလန်ဖြစ်လာစေဟို့တွပ် နန်းနို့ရဲ့ ခေတွပ် ဖုလောန်ဟူလမ်းဟို့ ပြင်ဆင်ဂေပါ။

14 လူလေန သင့်သင့်တင့်တင့်နေဘီး ငြိသတ်ရှင်းန သန်ရှင်းရှင်း ပါရမီဟို့ မှီအောက်လိုက်ဂေပါ။ သန်ရှင်းရှင်း ပါရမီ မှော့ဘဲနေဟာ ဖယ်သူလည်း ဘုရားသခင်ဟို့ ဖူးမြင် ရဟို့ မူဟူ။

15 နန်း နို့ လေ ဟာ တဇောင် တ ယော့-က် လည်း ဘုရားသခင်ရဲ့ ကျေးဇူးတော်ဟုနေ ကွာဟားဘဲနေဟို့ တွပ်န၊ ခါးဟူ ပန်ပြစ်ပေါ့-က်ထွပ်ဘီး နန်းနို့လေဟို့ နှော့-က်ယှစ်ဟူကြောန့် လူလေဟာ အယ်ရာလေအားဖြင့် ပြစ်န ညစ်ညူးဘဲနေဟို့တွပ် ဒိပြုဂေပါ။

16 တရားဘဲဟူ မေထုန်ပြုဟူသူ မှော့ဘဲနေဟို့တွပ်န ဧ သောဟာ မှန်းတနပ်စာတွပ် သားဦးရပ်ရာဟို့ ရောင်းဟူ မျိုး ဘုရားတရားဟို့ ရှိသေဘဲဟူ သူလေ ယော့-က်လည်း မှော့ဘဲနေဟို့တွပ် ဒိပြုဂေပါ။

17 နန်းနို့ သိဂေဟူတိုင်းဘဲ သူဟာ နှော့-က်မှ ကောန်း ဂျီးမင်္ဂလာဟို့ မွဲဆစ်ခံရှင်ဟူလည်းဘဲ ငြင်းပယ်ဇာဟို့ ခံ ရဘီး ကောန်းဂျီးမင်္ဂလာဟို့ ရရာတိုင်း လိုရှင်ကြောန့်* မျ

* 12:17 ၁၂.၁၇ ကောန်းဂျီးမင်္ဂလာဟို့ ရရာတိုင်း လိုရှင်ကြောန့်၊ အယ်မျိုးမှော့ဘဲနေဟာ သူဟာ ကောန်းဂျီးမင်္ဂလာဟို့ ကြိုးစားဟယ်။

စ်ရယ်ကုလဘီး တောန်းခံဟူလည်းဘဲ သူ့ဖ စိပုလောန်းလဲ
လာဇာဟို့ မြင်ရဟူ။

18 နန်းနို့လေဟာ လတ်န တို့ထိနိုင်ဟူ တောန်ဟို့ဖြစ်ဖြစ်၊
လောန်ဟူ မီးဟို့ဖြစ်ဖြစ်၊ မှောန်မဲဟူ မိုးတီတိုက်ဟို့ဖြစ်ဖြစ်၊
မှောန်မိုက်ဟို့ဖြစ်ဖြစ်၊ မိုးသတ်မှောန်တိုင်းဟို့ဖြစ်ဖြစ်၊

19 တံပိုးမူဟူ သံဟို့ဘဲ ဖြစ်ဖြစ်၊ စကားတော်ဟို့ဘဲ
ဖြစ်ဖြစ် ချည်းကပ်ဂေဟူဇာမူဟူ။ အယ်မူသံဟို့ ကြားဟူ
လူလေဟာ နှော-က်ထပ် မိန့်တော်မူဘဲနေဟို့တွပ် တောန်း
ဗန်ဂေဟယ်။

20 ဖြားဖြစ်ကြောန်နူးဆိုဟာ “လိဆန်ဖြစ်ဟူလည်းဘဲ
အယ်တောန်ဟို့ ထိမိဟယ် ဆိုဟာ ကုလော့-က်ခဲနပစ်
သတ်စေ” ဆိုဘီး မိန့်တော်မူဟူ သံတော်ဟို့ လူလေဟာ
နားခံနိုင်ဘဲကြောန် ဖြစ်ဟယ်။

21 အယ်မျိုး ထန်းထန်ရှားရှား မြင်ရဟူဇာဟာ ရရာ
တိုင်း ကြော့-က်ဇာကောန်းဟူကြောန် မောရှေဟု “ငါဟာ
ကြော့-က်ရှုံ တူလော့က်ဘီး နေရဟယ်” ဆိုဘီး ပြောလေ
ဟယ်။

22 နန်းနို့လေဟာ ဇိအုန်တောန်န သတ်ရှင်တော်မူဟူ
ဘုရားသခင်ရဲ့ မြို့တော်ဖြစ်ဟူ ကောန်းဂန် ယေရုရှလင်
မြို့ဟို့ဘဲဖြစ်ဖြစ်၊ တိုင်းမသိ ရရာတိုင်း များဟူ ကောန်း
ဂန်တမန်လေရဲ့ စည်းဝေးရာဟို့ဘဲဖြစ်ဖြစ်၊

23 ကောန်းဂန်စာရင်းဝမ်ဟူ သားဦးလေရဲ့ သင်းတော်
ဟို့ဘဲဖြစ်ဖြစ်၊ လူလေ ဂူလောင်းဟို့ တရားစီရင်တော်မူဟူ

ဘုရားသခင်နားဟို့ဘဲဖြစ်ဖြစ်၊ စောင့်လင်ရှင်းဟို့ရော-က်
ဟူ ပြောန့်မတ်ဟူ သူလေရဲ့ စိဝိညာဉ်လေဟို့ဘဲဖြစ်ဖြစ်၊

24 ပဋိညာဉ်တရားသစ်ရဲ့ အာမခံဖြစ်ဟူ ယေရှုနားဟို့
ဘဲဖြစ်ဖြစ်၊ အာဗေလရဲ့သွီး ပြောဆိုဟူဇာထတ် ပိုဘီး မြ
တ်ဟူရာဟို့ ပြောဆိုဟူ ပတ်ဖျန်းဟူ သွီးတော်နားဟို့ဘဲ
ဖြစ်ဖြစ် ရော-က်ဂေဟယ်။

25 အယ်ကြောန့် နန်းနို့လေဟာ မိန့်တော်မူဟူ သူရဲ့
စကားတော်ဟို့ ငြင်းဆန်မိဘဲနေဟို့တွပ် ဒိပြုဂေပါ။ မုလေ
ဂီးထတ်မာ ဗျာဒိတ်တော် ဆင့်ဆိုသူရဲ့ စကားဟို့ ငြင်းဆန်
ဟူ သူလေဟာ ပြစ်လွတ်ခွင့်မေ့ဘဲနေဟာ အယ်လော့-က်
နမကဟု ကောန်းဂန်ဘောင်ဟု မိန့်တော်မူဟူ သူရဲ့ စကား
ဟို့ နို့လေ နားထောန်ဘဲနေဟာ ပိုဘီး ကီးလေးဟူ ပြစ်န
ဖယ်မျိုး လွတ်ကင်းနိုင်မယ်နူး။

26 ရင်းရင် ဒူးဟု ဗျာဒိတ်တော်သံဟာ မုလေဂီးဟို့
လှောက်ဟူ ဇာဖြစ်ကြောန့် ကိုယ်တော်ဟု “နော့-က်ထပ်
ခါ ငါဟာ မုလေဂီးနု ကောန်းဂန်ဟို့ လှောက်အူးမယ်” ဆို
ဘီး ဂဒိတော်ရှိဟယ်။

27 “နော့-က်ထပ်ခါ” ဆိုဘီး ပြောဟူ စကားရဲ့ ဓိပါယ်
ဟာ လှောက်ဘဲဟူ ဇာလေဟို့ တည်စေဟို့တွပ် လှောက်
ဟူရာလေဟို့ လောကရာလေမျိုး ပယ်ဖျစ်လေ့မယ် ဆို
ဘီး ဆိုလိုဇာဖြစ်ဟယ်။

28 အယ်ကြောန့် နို့လေဟာ လှောက်နိုင်ဘဲဟူ နိုင်ငံဟို့ ရ
ဟူသူလေဖြစ်ကြောန့် ခန့်ညား ကြော့-က်ရဲ့ဟူ သဘောန

ဘုရားသခင် နှစ်သက်ဟူ နည်းတိုင်း ဝတ်ပြုကိုးကွယ်ဟို့
တွပ် ကျေးဇူးတော်လေဟို့ စွဲလန်းဂေဇို။

²⁹ ဖြားဖြစ်ကြောန့်နူးဆိုဟူ နို့လေရဲ့ ဘုရားသခင်ဟူ
လောင်ဟူမီး ဖြစ်တော်မူဟယ်။

13

ဘုရားသခင် နှစ်သက် တော် မူ ဟို့ လောက်ဆောန် ဟူ
နည်းကြောန့်

¹ ညီကို မောန်နှမရှင်းရှင်း ရှစ်ရှင်းမြစ်တာန တည်နေဂေ
ပါ။

² ဧည့်ဝတ်ပြုဟူဇာဟို့ မေ့ဂေန။ ဖြားဖြစ်ကြောန့်နူးဆို
ဟူ တချို့လူလေဟူ ဧည့်ဝတ်ပြုဟူ ခီမာ ကောန်းဂန်
တမန်လေဟို့ မှတ်တမဲ့ ဧည့်ခံဂေဟယ်။

³ နန်းနို့လေဟူ ကျဉ်းကုလခံနေရဟူ သူလေနတူးဒု
ကိုယ်လည်းခံနေရဟူမျိုး မှတ်ယူဘီး သူးနို့လေဟို့ ဒီရဂေ
ပါ။ နန်းနို့လေဟူ ကိုယ်ခန္ဓာန လွတ်ကင်းဘဲဟူ သူလေဖြ
စ်ဟူကြောန့် ညဉ်းဆဲခံရဟူသူလေဟို့ အော့-က်မေ့ဂေပါ။

⁴ လူလေ ဂူလောင်းဟူ သူးနို့ရဲ့ မင်္ဂလာဆောန်ရှင်းန
သစ်စသံဝါသပြုဟူ မူရာဟို့ ညစ်ညူးမှုမေ့ဘဲန အသရေ
ရှိစေပါ။ တရားဘဲဟူ မေထုန်ဟို့ ပြုဟူသူလေန သူမယား
ဟို့ ပြစ်မှားဟူသူလေဟို့ ဘုရားသခင် စစ်ကြောစီရင်တော်
မူလေ့မယ်။

⁵ နန်းနို့လေရဲ့ ကျင့်ကြံပြုမူရှင်းဟူ ကပ်ဟို့ တတ်မတ်
မူ မေ့ဘဲန ကိုယ့်မာရှိဟူ အောက်စာန ရောင့်ရဲမှု ရှိဂေပါ။

ဖြားဖြစ်ကြောင့်နူးဆိုဟာ “ငါဟာ နန့်ဟို စွန့်ဟားဟု။ နန့်ဟို လောင်းဝ ပစ်ဟားဟု” ဆိုဘီး ဂဒိတော် ရှိဟယ်။

⁶ အယ်ကြောန့်၊

“ဘုရားသခင်ဟာ ငါ့ဟို မစတော်မူဟူ သခင် ဖြစ်ဟူကြော
န့်

လူဟာ ငါ့ဟို ပြုနိုင်သမျှဟို ငါကြော-က်ဟု” ဆိုဘီး
နို့လေဟာ ရဲရင့်ဟူ စိန် ပြောဆိုရဟူခွမ် ရှိဂေဟယ်။

⁷ ဘုရားသခင်ရဲ့ စကားတော်ဟို ဟောပြောဟူ နန်းနို့
လေရဲ့ ခေါင်းဆာန်လေဟို အော့-က်မေ့ဂေပါ။ သူးနို့လေ
ဟာ ဖယ်မျိုး ကျင့်ကြံပြုမူဘီး သေဟားဂေဟူ ဆိုဇာဟို
စေ့စေ့ဆင်ခြင်ဘီး သူးနို့လေရဲ့ ယောင်ကြည်ရှင်းဟို မှီ
အောန်လိုက်ဂေပါ။

⁸ ယေရှုခရစ်ဟာ နန့်ကီး၊ အယ်နေ၊ နော့-က်ကာလစဉ်
ဆစ် ပုလောန်းလဲဘဲန နေတော်မူဟယ်။

⁹ ထူးထူးပြားပြား ယူဝါဒသစ်လေ နော့-က်ဟို လိုက်
ဘီး စိဖော့-က်ပုလန်ဂေန။ ဖြားဖြစ်ကြောင့်နူးဆိုဟာ
စာအားဖြင့်မူဘဲ ကျေးဇူးတော်အားဖြင့် စိန်လောင်းဟို
တည်ကြည်စေဟူဇာဟု ပိုဘီး ကောန်းမြတ်ဟယ်။ စာ
အားဖြင့် သတ်ရှင်ရှော့-က်လှမ်းဟူ သူဟာ ကျိုးဟိုရဂေ
ဟု။

¹⁰ တဲတော်မာ ဝတ်ပြုဟူ သူလေ စားပိုင်ခွမ် မှော့ဘဲဟူ
ယဇ်ပလုလင်ဟာ နို့လေမာ ရှိဟယ်။

11 ဖြားဖြစ်ကြောနဲ့နဲ့ဆိုဟာ ယဇ်ပုရောဟိတ်မန်းဟာ ပြစ်ဖြေဟူ ယဇ်ကောန်ရဲ့ သွီးဟို့ သန့်ရှင်းဆောင်းဌာနထဲ ဟို့ ယူသွမ်းဆောန်ဘီးမှ ယဇ်ကောန်လေရဲ့ ကိုယ်ဟို့ တပ် ပုလန်မာ မီးရှို့ရဟယ်။

12 အယ်မျိုးတိုင်းဘဲ ယေရှုဟာ သူ့ရဲ့သွီးန လူလေဟို့ စင်ကြယ်စေဟို့တွပ် မြို့ခွဗော့-က်ပုလန်မာ သေခံတော်မူ လေဟယ်။

13 အယ်ကြောနဲ့ နို့လေဟာ အယ်သခင်နတူးဒု ကဲ့ရဲ့ခံ ဘီး တပ်ပုလန် ကိုယ်တော်နားဟို့ တွပ်ဟားဂေဇို။

14 ဖြားဖြစ်ဟူကြောနဲ့နဲ့ဆိုဟာ အယ်လောကဟာ နို့လေ တွပ် တည်မြဲဟူမြို့ မေ့ဟု။ နော့-က်ဖြစ်လာမယ့်မြို့ဟို့ဘဲ မျှော်လင့်နေဂေဇာ ဖြစ်ဟယ်။

15 အယ်ကြောနဲ့ နို့လေဟာ နာမတော်ဟို့ ဝန်ခံဘီး နှောက်ခမ်းသီးဖြစ်ဟူ ချီးမွမ်းရှင်းယဇ်ဟို့ သခင်ယေရှု ခရစ်အားဖြင့် ဘုရားသခင်ရှေ့တော်မာ မြဲဒမ်း ပူဇော်ဂေ ဇို။

16 ကျေးဇူးပြုဟူမှု အောက်စာဝီမျှဟူ မူလေဟို့ မေ့ဂေ န။ အယ်မျိုးပြုဟူ ယဇ်ဟို့ ဘုရားသခင်ဟာ နှစ်သက် တော်မူဟယ်။

17 နန်းနို့လေရဲ့ ခေါင်းဆောန်လေ စကားဟို့ နှိခိုလဘီး နားထောန်ဂေပါ။ သူးနို့လေဟာ ကိုယ်တိုင် စစ်ကြောခံရ ဟူ သူလေမျိုး နန်းနို့စိဝိညာဉ်ရဲ့ ကျိုးတွပ် စောန့်ရှေ့-က် နေဂေဟယ်။ နန်းနို့လေဟာ သူးနို့စကားဟို့ နားထောန်ဟု

ယ် ဆိုဟာ သူးနို့လေ ဝန်းသာရှင်းန လောက်ဆောန်ဂေလေ့
မယ်။ အယ်မျိုးမှုဘဲနေဟာ သူးနို့လေ ဝန်းနဲရဟူကြောန်
နန်းနို့လေ ဖယ်မျိုးလည်း ကျိုးရှိဟို့ မှဟူ။

18 နို့လေတွပ်လည်း ဆုတောင်းပေးဂေပါ။ နို့လေဟာ
ကိုယ့်ကိုယ်ကိုယ် သိဟူစိ ကြည်လင်ဟယ် ဆိုဇာဟို့
ယောင်ကြည်ဘီး ရာရာတိုင်းမာ ကောင်းကောင်းမွန်မွန်
ကျင့်ကြံနေဂေဟို့တွပ် လိုရှင်သူ ဖြစ်ဟယ် ဆိုဇာ စိစွဲလမ်း
မှု ရှိဂေဟယ်။

19 ငါဟာ နန်းနို့လေနားဟို့ ပြန်းပြန်ဟား လာနိုင်ဟို့တွပ်
နို့လေဟို့ ဆုတောင်းပေးဟို့ ပိုဘီး နှိုးဆော်တောင်းဗန်ပါ
ဟယ်။

နီဂေါင်းချောက် ဆုတောင်းရှင်းကြောန်း

20 ထာဝရပဋိညာဉ်န ဆိုင်ဟူ သူ့သွီးတော်*အားဖြင့် သိုး
လေရဲ့ သိုးထီးဂီးဖြစ်ဟူ နို့လေရဲ့ သခင်ယေရှုဟို့ သေရှ
င်းဟာ နှုဆောန်တော်မူဟူ ငြိသတ်ရှင်းရဲ့သခင် ဘုရားသ
ခင်ဟာ။

21 ရှေ့တော်မာ နှစ်သက်တော်မူဟူ မှုရာလေဟို့ ယေရှု
ခရစ်အားဖြင့် နန်းနို့လေဟို့ ပြုတော်မူဘီး နန်းနို့လေဟာ
လိုတော်ဟို့ လိုက်ရှေ့-က်ဂေဟို့တွပ် ကောင်းဟူ ကျင့်
ဘောင်းဇောင်လေန ပြုပြင်တော်မူပါစေ။ အယ်သခင်
ယေရှုခရစ်ဟာ ကမ္ဘာဆစ်ဆစ် ဖောင်းကီးတော်မူပါစေ!
အာမင်။

* 13:20 ၁၃.၂၀ သူ့သွီးတော်၊ အယ်မျိုးမှုဘဲနေဟာ သူ့ရဲ့ သေခံပူဇော်မှု။

နိဂိုင်းချောက် မှာဟူစကားကြောင်း

²² ညီကို မောန့်နှမလေ၊ ငါဟာ နန်းနို့နားဟို့ လိုရင်းတို ရှင်းအားဖြင့် ရေးပို့လိုက်ဟူ အယ်မူ တိုက်တွန်း အားပေး စကားဟို့ သီးခံဘီး ခံယူဟို့တွပ် ငါတောန်းဗန်ပါဟယ်။

²³ နို့လေရဲ့ညီ တိမောသေဟာ လွတ်လာဘီ ဖြစ်ဟူ ကြောင်းဟို့ နန်းနို့လေဟို့ သိစေရှင်ပါဟယ်။ သူဗြန်းဗြန် ရော့-က်လာဟယ် ဆိုဟာ ငါဟာ သူနတူးဒု နန်းနို့လေ ဟို့ လာတို့မယ်။

²⁴ နန်းနို့ ခေါင်းဆာန်လေန သန်ရှင်းသူလေ ဂူလောင်းဟို့ နှောက်ဆစ်ပါဟယ်။ ဣတလိ ပြည်သူပြည်သားလေဟာ နန်းနို့လေဟို့ နှောက်ဆစ်ဂေပါဟယ်။

²⁵ နန်းနို့လေ ဂူလောင်းမာ ကျေးဇူးတော် ရှိပါစေ။

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1